

# Rom

## Pas Por ai Romihündambo sürü papimarandi

---

**1** <sup>1</sup>Karihasihandüri ro Por-anahi, roana Krai Sisasindi moani ratüpuria-rihandeimb-anahi. God ai wambo Kraisindi hoafi semindi ho-rambohünda kafaore hiniḡireandirühi asu se aboedi hoafi ra bokandihawandi mehu-anahi nda. <sup>2</sup>Aboedi hoafi ndanahambo God ai horombo hoafimareandi asu hoafi ra ahandi hoafi hoafiyomo-rundeimbi ai ahandi Bukambe sürü paru masihoemo. <sup>3</sup>Aboedi hoafi ranana ahandi Nimori ranahamboane hoafimayo. Nimori ra Sudahündi nindou adükari bogori Defitindi sirambeahindi nindoumbofi tükümeḡiyu. <sup>4</sup>Ḳga ahandi sürühoeimbi yifiafi ranahambo ana God-ani ahandi afindi hondayu. Ai Godindi Nimor-ani ranimbo weindahi randeanda tüküfembohünda God ai ahandi ḡḡinindi afindinambo ahambo yifihündi botimariri. Sapo aiana sihefi Adükari Sisas Krai ra. <sup>5</sup>Ahandi süḡguyo ro hoafi semindi ho ratüpuria ra masahumindeḡi. Asu Suda-yafe ndifo nimorehi nindowenihi muḡuambo hifihü ranai Sisasimbo anihondümbö-ndihorühi ahandi hoafi ra süḡgumbirihindi yahuhaya ranimbo-hünda God ai yihöefimbo kamafoareamuni. <sup>6</sup>Asu nindou Rom ḡgoafihü amarei ra siheimbo kameihü hoafi ra hoafimbo koamarihemuni. Sapo siheimbo God ai Sisasind-anei mehündüri. <sup>7</sup>Se Rom ḡgoafihü amarei siheimboyu sapo God ai ḡḡusüfo parearühi asu ai nindou wand-anei yahuhaya dibonimendüri, siheimboanahi ro sürü nda paparihandi. Sihefi Ape God asu Adükari Sisas Krai ai siheimbo moani hipöambo-ndineandürühi ḡḡusüfoambe afurifimbi hohoanimo mbisabina-ndüramboane.

### Por ai Romihündi hoeifendürimbo yahumboani

<sup>8</sup>Ro randihe hoafindahandüri samboanahi, muḡuambo hifi nindou amarei ranai se anihondümbö-rihindeimbi nindou animboei ranimbo wataporimbo-arihündi ranimboanahi asu Sisas Kraisindi süḡu

siheimbohünda wandi God ranahambo hihifarihüni. <sup>9-10</sup>Godindi Nimori ranahambo aboedi hoafi ra hoafiya rihandühi wandi muṅguambo hohoanimo Godimbo ratüpuri-yahühanahi. Ai fifireamboani sapo ro nimbi-nimbisi siheimbo hohoanimoyahühi ahambo didibafiya arihandi. Ai wambo siheimbo hoeifendürimbo farihefe-ndirimbohündambo hohoanimoayu ana, asu ro süṅgunambo didi siheimbo hoeindi-heirimboyahi. <sup>11</sup>Ro Yifiafi Aboedindi-mayo moatükuni siheimbo ṅginemindi-ndürimbohünda segodürimbo sambo, ranimboanahi asu ro siheimbo hoeifendürimbo hohoanimo-ayahandüri. <sup>12</sup>Hoafi nda rahurai-ane: Sihefi anihondümbofe ranina simbori-simbori ṅginimbi-ramindimun-amboane samboanahi hohoanimoayahi.

<sup>13</sup>Wandafi mami, se ndorihififirindihindi, ro siheimbo sowana afindimbo sinimbo samboanahi hohoanimoayahi. Ṽga asu wambo afindimbo bidifiri moatükun-ane nafi güreandiri marandi. Ro Godindi ratüpuri ratüpuriyahühi Suda-yafe ndifo aheimbo fariheheandürani ahandi hoafi anihondümbo-rihindeimbi nindou tüküyahi marihünd-ane. Ṽga ranimboanahi siheimbo sowanambo amboani sinimbo samboanahi, sihei anihondümbofe hohoanimo ra farihefembohünda sapo aheimbo mafariheheandüri nou. <sup>14</sup>God ai wambo rani ratüpuri masendira ranimboane asu roana nindou Grikindi adükari ṅgoafihü amarei-anei asu nindou nimambe burayei-ane, nindou fifirihindeimbi rananei asu fifirifekoate-mayei rananei muṅguambo aheimbo hoafi ro moani bokandihehea samboanahi ṅgusüfoambe fufurafoareandiri. <sup>15</sup>Ranimboanahi asu Godindi aboedi hoafi nda Rom ṅgoafihü amarei siheimbo amboa bokandiheheandüri sa hehea ro hürütayahi.

### **Aboedi hoafi ana Godindi ṅginind-ane**

<sup>16</sup>Ṽga ro moai aboedi hoafi ranahambo amoanṅṅiyahi. Nimboe sapo ranana Godindi hoafi ṅginindi hamindiyo hayamboane asu ai didiyei anihondümbo-arihindi ranaheimbo aboedambo-reandüri-randeimbi mayowambo wambo. Sudahündi aheimbo-so boatei tüküfe mburamboyo asu süṅguna ahei ndifo ranaheimbo-so amboa tüküme Feyo. <sup>17</sup>Ṽga aboedi hoafi ra sapo God ai nindou anihondümbo-arihindi ranaheimboya nindou mbumund-anei ehündüri asu Godindi mbumundi hohoanimo hoafi ra ranambeah-ane weindahi tükefeyo. Mbumundi hohoanimo ranana anihondümbofe hohoanimo rani-süṅgu yanggiri weṅgurühü peyo haya hombo bidifirani tükefeyo. Ṽga Baiborambe hoafi ranahambo yare hoafiyowohü yahoya, 'Nindou ranai ana anihondümbofe hohoanimo rani-süṅgu yanggiri nimboeimboyei,' meho.

### **Muṅguambo nindou Godimbo daboadanambo-arihori**

<sup>18</sup>Nindou sapo Godimbo daboadanambo-rihorühü asu moaruwai hamindi hohoanimoyeihü ahei moaruwai hohoanimonambo ahandi

anihondü hoafi ra gürühi arihündi. God sünambe amaru ahandi hürütü ra ranaheimbo weindahi tükufe arandi. Asu ai ranambo nindou rahurai ranaheimbo yibobondearimbui. <sup>19</sup>Ŋga nindou ai God ranahambo fifirifembo hohoanimo ra moai dibo yaŋgoro. Ŋga God ai ahandihoari rani-moatükuni ra aheimbo weindahi-mareandüri. <sup>20</sup>Yini, God ai hifi nda nafimarandi asu horombo hondü peyo haya ho-hombo hapondani amboani rani-moatükuni ai nafimarandi ra nindou ai hoeirihimboanei. Raninambo asu nindou ranai God ahambo ŋgiri himboari hondünambo hoeindihorisi, ŋga ai nünŋu-nahurayyu ranahambo fifirindihimboyei. Ai ahandi koadürümbo yaŋgoroweimbi ŋginindi ra fifindihindi asu ai God hondayu ranahambo fifirindihimboyei. Ranimboane asu ai ŋgiri roana moai ranahambo fifirihundi mbisei.

<sup>21</sup>Sapo nindou ai Godimbo fifiri-marihoriyosi, ŋga asu ai moai Ahambo adükar-ani seihü, sihefi God-ani sahündowohü hihifirihori rihündi. Ŋga asu moanindi moatükunimbo ŋgusüfo pamarihindi asu ahei hohoanimokoate hohoanimonambo ahei ŋgusüfo ra nimbi mamarondüri. <sup>22</sup>Asu ai rarihi hoafiyeihei seiya, roana fifirihundeimbi nindou-anefi, masei, ŋga ai nindou fifirifekoate tükümehindi. <sup>23</sup>Asu ai God koadürümbo-koadürümbo nünŋuweimbi ranahambo hiniŋgirihi hehi asu ai sümbuyo-randeimbi moatükuni, nindou, ndu, ninihondi, wako sisami ranahambo hei didibafiyei rihündühi hihifi-hihifiyei marihündi.

### **Mamikari hohoanimo**

<sup>24</sup>Nindou ranai moaruwai rani hohoanimo-mayeiamboyu asu God ai aheimbo yare moani hiniŋgi-mareandüra asu ai yikoarifo hohoanimo ŋgusüfoambe botimareandüri asu amoaniŋgümbi moatükuni simbori hoyei marihündi. <sup>25</sup>Nindou ra Godindi anihondü hoafi ranahambo hiniŋgirihi hehi asu tikai hoafi süngurihi arihündi. Raniyei asu ai nine-moatükuni God nafimarandi ranahambo hohoanimoyeihi didibafiyei marihündi, ŋga asu ai God muŋgu-moatükuni nafimarandi ranahambo moai anihondümbo-rihorühi didibafiyahindo rihündi. Ŋga awi sihiri muŋguambo si aho ra ahambo adükar-ani mbisefimboane, ŋga anihond-ane.

<sup>26</sup>Nindou ranai moaruwai hohoanimo ramarihindi ranimbo-hündambo God ai aheimbo amoaniŋgümbi hohoanimo ŋgusüfoambe amaro ra-süŋgure hiniŋgi-mareandüri. Ranimboyei asu nimorehi ai-amboani nindowenihi-dibo aboedi niŋgokoate-yeihi ŋgorü nimorehi dibo mami rani hohoanimo süngumarihündi. <sup>27</sup>Asu nindowenihi ai-amboani rani-süŋgumboemo ai hohoanimo aboedi ahamundi nimorehi-babidi refembo ra hiniŋguru houmbo nindowenihi ahamundihoari bogo moaruwai hohoanimombo mehomo. Raniyomo asu ai amoaniŋgümbi moatükuni yaru arundi ranimbo-hünda asu ahamundihoari tiŋirifo afindi masowandümo sapo ai ramefundi rani simogodihümbo.

<sup>28</sup>Nindou ai Godindi anihondü hohoanimo fifirife ranahambo süngufembo moei masei ranimboyu asu God ai ahei yikoarifo hohoanimo moaruwai yare hiniŋgimareandüra, asu ai rani-moatükuni refembo yowanimo-mayo ra ai rani-süngumarihindi. <sup>29</sup>Asu aheimbo hohoanimo moaruwai hamindi menŋoro ranai tüküra pimareandüri yikoarifo hohoanimo, sümbuyo-randeimbi hohoanimo, hohoanŋife hohoanimo, ŋgorümbo yifiari hohoanimo, ŋgorümbo ŋgusüfoambe moaruwaimbofe hohoanimo, nindoumbo hifokoefe hohoanimo, ŋginindi hoafi hohoanimo, ŋgorümbo tikai hoafi hohoanimo, ŋgorümbo moaruwaimbofe hohoanimo, muŋgu hohoanimo ra süngumarihü hei. <sup>30</sup>Raniyei asu ŋgorümbo daboarani hoafi hohoanimo, ŋgoründi ndüri weindahi hamindi moaruwaimbofembo hohoanimo, Godimbo yiboarukofi hohoanimo, hoafi mbahirihembi hohoanimo, afindi-afindeimbi hohoanimo, ahei fi ranahambo bori hohoanimo, muŋguambo ra süngumarihü hei. Ai simbori moaruwai hohoanimo ranahambo refembo hohoanimo, asu hond-afindi-yafe hoafi himbori-koate, hohoanimo muŋgu ra rareirani hohoanimo muŋguambo ra rarihi marihündi. <sup>31</sup>Ai ŋgusüfo hohoanimokoate-anei, asu moai ahei hoafaye ranahambo kikihirihümündi, moai ahei fikiminindimbo hohoanimoyei, asu ai moai nindou ŋgorümbo hipoambo-rihindühi farihehindüri. <sup>32</sup>Nindou ranai Godindi mbumundi hohoanimo hoafi ra ndorihifi fifirihindi. Hoafi ra yare hoafiyowohü yahoya, ‘Nindou düdi ai hohoanimo yahurai hohoanimoayu ana, yifimbiyuwamboane,’ meho. Nindou ai ra fifirihindisi, ŋga moaruwai rawarihindi. Asu rani yangiriyopoani, ŋga nindou bidifiri ai rawarihindi ranaheimbo siaoyahi arihündi kameihi.

### Godindi yibobofe hohoanimo ai mbumund-ane

**2** <sup>1</sup>Ranimboane asu nindou didiyei nindou ŋgorümbo papi-hoafirihündürani, se ŋgiri ro hütiyefipoani mbisei. Ŋga se ŋgorümbo papi-hoafirihündürani se sihei-fimbo amboani papi-hoafirühi arihündi, nimboe se rani moatükuni ai rawarihindi ra sapo se-amboani rawarihindi ranimbo wambo. <sup>2</sup>Nindou sapo moaruwai hohoanimo rahurai rawarihindi ranaheimbo God ai papi-hoafarandüri, ŋga ahandi yibobofe hohoanimo ra mbumundi saf-ane, ra sihiri fifirihundi. <sup>3</sup>Ŋga se nindou bidifirambo ai hohoanimo rahurai hohoanimoayu ranahambo papi-hoafiri-hündühaneisi, ŋga se-amboa siheihuari rani hohoanimo rahurai rarihindühanei, ŋga se nüŋgurihi ranahambo hohoanimo-yehiyeia? Asu se Godindi yibobofe tüküfeyowambe ra aboedambo-ndahumboyefi seimboyei? <sup>4</sup>God ai siheimbo hohoanimo aboedi safi hohoanimoayundürühi siheimbo nimai yibobofe-ndürikoate gedühi hifandarandüri. Ŋga ahandi hohoanimo ra se moanane seimboyei? Godindi aboedi hohoanimo ra siheimbo didiboado-fendürani

asu se hihirife ahambo süngufimbo-hündamboane, nga se ranahambo moai fifirihindiyo? <sup>5</sup> Nga se afindi-afindeimb-anei asu ngiri sihei moaruwai hohoanimo ra hiniᅅgindihindi. Mami rani hohoanimo süngu Godindi-mayo ᅅginindi hamindi hohoanimo ra siheiwami papirihündühi nou-anei. Asu se süngunambo God ai ᅅginindindühi ahandi mbumundi hohoanimo süngu yiboboreandambe animbo rani-simboani weindahi tükündifeyoani asübusümbi hohoanimo ra ndahümündimboyei. <sup>6</sup> Nga nindou mamami nine-moatükuni ai rawarihindi rani simogodihumbo animbo God ai aheimbo yibobondearümbui. <sup>7</sup> Nindou bidifiri didiyei aboedi hohoanimo ra sünguarühi hei ana, sapo God sihefimbo ndüri adükarimboane asu sümbokoate yangiri niᅅgombo ranane muᅅguambo rani-moatükuni mbisemuna seimboanei rawarihindi. Nindou rahurai ranaheimbo-animbo God ai yangiri koadürumbo niᅅgoweimbi ra dagadürimbui. <sup>8</sup> Nga asu nindou bidifiri didiyei ai ahei fimbo yangiri hohoanimoyeihi anihondü hohoanimo ranahambo yiboaruko-rühindühi asu nine hohoanimo moaruwai meᅅgoro ra süngufembo hohoanimoaye ranaheimbo-animbo God ai ᅅginindindühi tiᅅjirifo afindi dagadürimbui. <sup>9</sup> Rani-simboan-animbo nindou muᅅguambo sapo hohoanimo moaruwai meᅅgoro sünguarühi hei ranaheimbo tiᅅjirifo-ane asu asübusi afindi ranane rani-moatükuni ra dagadürimbui. Rani-moatükuni ra Sudahündi aheimbo-so boatei tükündifendüri mbundambo-animbo asu süngunambo muᅅguambo nindou amuri-maye aheimbo-so amboani tükündifendürimboe. <sup>10</sup> Nga asu nindou muᅅguambo didiyei ai sapo hohoanimo aboedi ra-sünguarihindi ranaheimbo-animbo God ai ahandi himboamupui-randeimb-ane, ndüri adükar-ane asu ᅅgusüfo afurife kife-ane muᅅguambo ra dagadürimbui. Rani-moatükuni ra Suda aheimbo boakori dagadüri hayambo-animbo asu nindou amuri-maye ranaheimbo amboani dagadürimbui. <sup>11</sup> God aiana ngiri nindoundi siri ranahambo hohoanimondu, nga muᅅguambo mami hohoanimo süngu türüfoa-reandürihani yiboboareandüri arandi. Nga nine-moatükuni nindou ai rawarihindi rani-süngu yangiri animbo ai türüboadeandühi yibobondeambui. <sup>12</sup> Nga nindou didiyei Mosesindi-mayo ahinümbi hohoanimo ranahambo fifirifekoate-maye-aneisi, nga moaruwai hohoanimo süngurihindani God ai ahinümbi hohoanimo ranahambo hohoanimokoate-nduhü aheimbo randeandüra awandihehimboyei. Asu Suda ai ahinümbi hohoanimo fifirihindisi, nga asu didiyei moaruwai hohoanimo süngurihindani ahinümbi hohoanimo rani-süngu yibobondearümbue.

<sup>13</sup> Nga nindou didiyei ahinümbi hohoanimo ranahambo himborimaye rani-yeipoani ai Godindi himboahü aboedi mbumundi nindou animboei, nga wani. Nga nindou ai ahinümbi hohoanimo ranai hoafimayo ranahambo süngurihindühi rawarühi hei ranai-animbo Godindi

himboahü aboedi mbumundi nindou tükündahimboyei. <sup>14</sup>Ŋga nindou Suda-yafe ndifo aiana moai ahinümbi hohoanimo ra fifirihindisi, ŋga bidifiri ai moani ahei hohoanimonambo yangiri aboedi moatükuni ahinümbi hohoanimo ranai hoafimayo rani-sungu-anei ratüpuriyei arihündi. Ai ahinümbi hohoanimo ra fifirifekoate-aye amboani asu ai aboedi hohoanimo ra aheihoari purihümündihü hohoanimoyeihanei. <sup>15</sup>Rani hohoanimo ai rani-sungurihi hohoanimoyei arihündi asu ahei aboedi hohoanimo ranai-ane ahei ŋgusüfoambe ahinümbi hohoanimo sürü apaiaro ranahambo nafuiarandi. Raniyei asu ahei ŋgusüfoambe ranai-amboani ahinümbi hohoanimo ra purarihümündi ranahambo nafuiayo, ŋga ŋgoambo yiboarukureandüri asu ŋgoambo ndoreandüri randühane. <sup>16</sup>Yibobofe si ra tüküfe simboan-animbo muŋgu-moatükuni sapo rahurai hamindi nindou aheimbo-so tükündifendürimboe God ai Sisas Kraisindi wari-sungu nindou-yei hohoanimo dibo mengoro ra türüboadeandühi yibobondea-ndürimbui. Hoafi yahurai ranane ro siheimbo aboedi hoafi hoafayahindürühi bokarihehe arihandi.

### Sudahindi asu ahinümbi hohoanimo

<sup>17</sup>Asu se nungu-mandahia? Se hoafiyehiya, roana Suda-aneŋi, ŋga ranimbo-hündambo ahinümbi hohoanimo ra fifirarihundi ranimbo wambo Godindi yibobofeambe sihefimbo aboedambo-ndeamunümbui ase. Asu se ro-aneŋi Godindi nindou-ayefi sei hehi ranahambo boriyei arihündi. <sup>18</sup>Sapo se ahinümbi hohoanimo ra yamundihi mburihü fifirihü hehimbo wambo God ai nine aboedi hohoanimo-ane ehu ra fifirarihindi asu mbumundi hohoanimoayo ranahamboane yifiraye. <sup>19-20</sup>Asu se hoafayehiya ahinümbi hohoanimo ranambe fifirife hohoanimo asu anihondü hoafi ra muŋgu fifirarihundi ase. Ranimbo-hündambo animbo himboatihari-maye ranaheimbo nafi nafuinda-hündürimboyeŋi asu nindou nimbi nimaroani aniboadei ranahei si rahurai-aneŋi. Asu roana sapo ŋgusüfokoate nindouyei didiboadorihundüri-rihundeimbanefi asu nimoakidibou yamundihundüri-rihundeimb-aneŋi muŋguambo rasei arihündi. <sup>21</sup>Se nindou bodimondambo yamundarihindüri ana, asu nimboe sihei fimbo yamundifekoate-ayeia? Se hoafiyehiya, se hühbuhünipoani, ase-aneŋi, ŋga asu se ra siheihoari hühbuhüniyehiyei waniyei? <sup>22</sup>Se hoafiyehiya, se nimorehi sisihimo, nindowenihi birabiripoani, ase-aneŋi, ŋga asu se siheihoari ra raweyahindühiyei waniyei? Se sisami god ranahambo yiboarukoarihündisi, ŋga asu se sisami godindi worambeahindi napo hühbuhüniyehi rihündai waniyeiai? <sup>23</sup>Se ahinümbi hohoanimo ranahambo ro fifirihumboanefi seihi ranahambo boriyei rihündühaneisi, ŋga se hohoanimo ra sungufekoate-yeihi asu rananimbo se Godindi ndüri moaruwaimbo-rihindühiyei waniyei? <sup>24</sup>Ŋga ranahambo Bukambe hoafi ranai yare hoafiyowohü

yahoya, 'Suda sihei sünguna nindou ngorü sirihündi ranai Godindi ndüri ranahambo moaruwaimborihi hoafiyei arihündi,' meho.

### **Hoeari kefe tirihefe hohoanimo asu ngusüfoambe hohoanimo-ane**

<sup>25</sup>Asu Suda se ahinümbi hohoanimo ranahambo sünguarihi hei ana, sihei hoeari kefe tirihefe hohoanimo ra mbumundi saf-ane. Iga asu se hohoanimo ranahandi süngufe hokoate-yeiani hoeari kefe tirihefe hohoanimo ranai refekoate himbondeimboyei. <sup>26</sup>Asu nindou ngorü sirihündi sapo didiyei ahei fihoeari ra kefe tirihefekoate-aneisi, nga asu ai rani ahinümbi hohoanimo ra sünguarihi hei ana, nindou ranaheimbo God ai nindou ranai ana fihoeari kefe tirihefimbimboyeimboanei mambüsüyo? <sup>27</sup>Yini, asu Suda seana ahinümbi hohoanimo ra Bukambe mbeñgorindürisi asu sihei fihoeari kefe tirihefe hohoanimoyeimb-aneisi, nga asu se ahinümbi hohoanimo ranahambo süngufekoate-yei arihündi. Iga nindou ngorü sirihündi aiana moai ahei fihoeari karihi tirihehi rihündisi, nga asu ahinümbi hohoanimo ra sünguarihindi ana, nindou rahurai ana ahei aboedi hohoanimonambo siheimbo papi-hoafarandüri. <sup>28</sup>Iga nindou ai moani fi yanggiri Sudahünd-ani ranai ana Suda hondüyopoani. Asu fihoeari kefe tirihefe hohoanimo hondü ranana moani fi ranahambo hohoanimo yanggiryopoani. <sup>29</sup>Iga nindou düdi ai Godindi-mayo moatükuni ra ahandi ngusüfoambe amarondo ana, ai Suda hond-ani. Fihoeari kefe tirihefe hohoanimo hondü ranana ai ngusüfoambeahindi hohoanimo yanggir-ane. Rani hohoanimo ranana moani fimbo hohoanimoyopoani, nga Yifiafindi hohoanimo-ane. Nindou rahurai ai nindouyei himboahü ndürümbi adükariyopoani, nga Godindi himboahü ndürümbi nindou-ane.

### **Moaruwai hohoanimo ra ngiri aboedi hohoanimo hifinambondeandi**

**3** <sup>1</sup>Ranana asu nüngunde Sudahündi-yei niñgombo ranai ngorü sirihündi-yei niñgombo ranahambo ngasündimandea? Asu fihoeari kefe tirihefe hohoanimo ranambe nine-moatükuni aboedi tükufe aranda? <sup>2</sup>E! Afindi muñguambo moatükuni aho ra rani-poani rani-poanireamboane. Mami adükari moatükuni ranane God ai Suda aheimbo ahandi hoafi hondü ai aheimborihi hifandimbirihünda yahuhaya masagadüri. <sup>3</sup>Asu nindou bidifiri ai hoafi ranahambo anihondümbo süngufekoate-aye ranana asu nüngumandifea? Nindou ai rani-moatükuni rawarihindi ranimbohünda asu God ai-amboani anihondümbo hohoanimo hoafi ahandi ra hiniñgimandeyo? <sup>4</sup>Tikaiyopoani, nga anihond-ane, God ai ngiri rani-moatükuni ra randeandi! Nindou ai tikarihi hehi hoafayei amboani asu God aiana moani anihondümbo mam-animbo hoafindimbui. Sapo Bukambe hoafi ranai God ranahambo yare hoafiyowohü yahoya,

‘Nüŋgu-simboaniyo se hoafindafani nindou hoafi ra anihondayo fifirimbiri-hindamboane.

Asu nüŋgu-sümboaniyo nindou sihambo papi-hoafindihünani sihafi hoafi ra ahei hoafi ranahambo ŋgasündimbi-reandüramboane,’

*Buk Song 51:4*

meho.

<sup>5</sup>Ŋga asu sihefi moaruwai hohoanimo ratüpuri rani hohoanimo ranai Godindi mbumundi hohoanimo ranahambo weindahindeandani ana, sihiri ranahambo nüŋgu mambisefa? God ai sihiri moaruwai hohoanimoyefi arihundi ranimbo-hünda ai sihefimbo simbori tñjirifo asemuni ana, asu ahandi hohoanimo ra moaruwai-ane, randihu ramambisefiyo wanimandefiyo? (Nindou sihefi hohoanimo sünguanahi moani ndarihe hoafiyahi.) <sup>6</sup>Rani-moatükuni ra ai wani! Asu God ai mbumundi hohoanimokoate-ayu ana, asu nüŋgunde ai nindou hifi ndanihü animboei ranaheimbo türüboadeandürühi yibobomandeandüra? <sup>7</sup>Asu wandi tikai hoafi hohoanimo ranambo Godindi hoafi hondü ra weindahi-riheandani asu ahandi ndüri adükari tüküfeyo ana, asu nimboe wambo moaruwai hohoanimo-yaheimbi nindou nou God ai papi-hoafarandira? <sup>8</sup>Refeana, sihiri randihu hoafindefihüya, awi sihiri moaruwai hohoanimo rani yanggir-animbo süngundihu ŋgefani ranimbo asu aboedi hohoanimo ra rani-süŋgu tükündifeyoani mambisefiyo? Karihasihandüri wani. Nindou bidifiri wambo tikai hoafiyahü-ndirihüya Por aiana yahurai hoaf-ane wataporimbora arandi asei. Süngunambo-animbo God ai aheimbo ramarihindi süŋgu türüboadeandürühi tñjirifo dagadürimbui, ŋga rani-moatükuni God ai refemboayi ra ai aboed-anesi.

### **Nindou moai mbumundi mami ai-amboani hifini nüŋgu**

<sup>9</sup>Awi refe ana, Suda sihiri nindou ŋgorü sirihündi ranaheimbo ŋgasündihurümbo-mbeyefiyo? Ra ai wani! Ro rani-moatükuni ranahambo hoafiyahmeimb-ane, nindou ŋgorü sirihündi ranane, asu Suda ranane, muŋguambo sihiri ana mami simogodi nindou yanggir-ane fi asu muŋguambo moaruwai hohoanimo süngurihu-rihundühi sihefihoari hüti-ane fi. <sup>10</sup>Ŋga Bukambe hoafi ranahambo yare hoafiyowohü yahoya,

‘Nindou mami ai-amboani moai mbumundi nüŋgu.

<sup>11</sup> Nindou mami ai-amboani moai Godindi moatükuni ranahambo fifireandi,

nindou mami ai-amboani moai Godimbo kokorüri randi.

<sup>12</sup> Muŋgoambo ai Godimbo daboadi hihirihori-mboanei.

Muŋguambo ai nindou moaruwai saf-anei tükümehindi.

Nindou mami ai-amboani nine-moatükuni aboedayo rani-moatükuni moai rareandi, ŋga wani,’

*Buk Song 4:1-3; 53:1-3; Saveman 7:20*

<sup>13</sup> Muŋgu yafambe ana yifambe gabudifekoate aniŋgo rahurai-anendüri.

Tikai hoafi moaruwai ranai ahei teifi rani-süngu hihire ho  
piyowohü moani yanğoroweimbi hoafi ranai tüküfih-ane.'

*Buk Song 5:9*

'Amoasirindi yahafambe nindou hifokoefembo tibagi amaro  
nahurai.'

*Buk Song 40:3*

14 'Ahei yafambe ambe ana nindoumbo God ai moaruwaimbo-  
mbireandüra-mboane yaho hoafi  
asu moaruwai hühütimbü hoafi rani yanğir-ane hoafiyei  
arihündi.'

*Buk Song 10:7*

15 'Aiana nindou hifokoefembo hohoanimoayei.

16 Aiana nahaniniyo ahei ra munğu-moatükuni moaruwaimbofe  
howohü tijirifo afindi sambo yanğiri nindou-anei.

17 Aiana nindou nğorü-babidimbo moai wudipoaporihü nimarei.'

*Aisaia 59:7-8*

18 'Aiana moai Godimbo akidou-amboa ahinirihorühi  
yihimboyahündo rihündi,'

*Buk Song 36:1*

meho.

19 Asu sihiri fifirihumboanefi, munğumbo hoafi ahinümbi hohoanimo  
ai hoafayo ra nindou didiyei ranahandi hoarehindeihü süngumbiri-  
hindamboane. Ranimboane asu nindou mam-amboa nğiri hoafindühi  
ro mbumund-anahi mbüsu, nğa wani. Asu nindou munğumbo Godindi  
himboahü hüti-anei ra nafuimbohünda ahinümbi hohoanimo engoro.

20 Nğa ahinümbi hohoanimo süngufembo raninambo nğiri nindou  
mamimbo amboani Godindi himboahü nindou mbumund-anahi mbüsu.  
Ahinümbi hohoanimo ranai ahandi ratüpuri sihefi hohoanimo moaruwai  
nafuiyamuni randühane.

### **Anihondümbofe süngu nindou ai Godindi himboahü mbumund-anei**

21 Nğa hapondani ana God ai ahandi nindoumbo mbumund-anei  
ehu hohoanimo ranana ai weindahi tüküfemboane. Nğa asu rani-  
moatükuni ra sapo ahinümbi hohoanimo menğoro rani-süngupoani  
tüküme Feyosi, nğa ahinümbi hohoanimo raniyo Godindi hoafi  
hoafiyomo-rundeimbi ranai-amboani rani-moatükuni ranahambo  
weindahiru masihoemo. 22 Godindi-mayo mbumundi hohoanimo  
ranana ndahurai-ane: Nindou munğumbo didiyei ai Sisas Kraimbo  
anihondümbo-arihori, ranaheimbo God ai nindou mbumund-anei ehu  
ahei anihondümbofe hohoanimo ranimbo-hündambo. Nğa nindou ranai  
nğorü-poaniyombo-yopoani. 23 Wani, nğa nindou munğumbo moaruwai  
hohoanimo-yeimboanei asu mbumundi sürühoeimbi hohoanimo God ai  
siaoayu ra mbonimbo-rihümündimboanei. 24 Nğa asu God ai aheimbo  
moani hipoamboarandüri. Ranimboyu asu ai nindou ranaheimbo aboedi  
mbumund-anei mehündüri sapo Krai Sisas ai aheimbo aboedambo-

mareandüri ranahandi süngu. <sup>25</sup> God ai Krai ahamboya, ahandi hori ranai pindowohü-animbo nindou didiyei ahambo anihondümbo-arihori ranai moaruwai hohoanimoye ra popoaimbi-ramindüramboane yahu hayamboya. God ai rani-moatükuni ramareandi ra ahandi hohoanimoye moani mbumundi hamindi hondayo ra nafuimbohünda ramareandi. <sup>26</sup> <sup>27</sup> <sup>28</sup> <sup>29</sup> <sup>30</sup> <sup>31</sup>

<sup>27</sup>Asu refe ana, nine-moatükuni ranahambo sihiri borimandefi habodefa? <sup>28</sup> <sup>29</sup> <sup>30</sup> <sup>31</sup>

<sup>29</sup>Asu nimboe rana? Asu God ai Suda-yei God yangiriyu? Asu nindou <sup>30</sup> <sup>31</sup>

#### God ai Abrahamimbo nindou mbumund-anafi mehundo

**4** <sup>1</sup>Asu sihiri sihefi amoao Abraham ranahambo nüngu mambisefa? <sup>2</sup>Abraham ai nine aboedi moatükuni ratüpurimayu ranahambohünda God ai ahambo nindou mbumundi aboed-ani mbehu-mbonana, asu ranimbo-hünda borimbomayu-hündiyosi. <sup>3</sup> <sup>4</sup>

‘Abraham ai Godimbo anihondümbo-mariri ranimboya asu God ai ahambo nindou mbumund-anafi mehundo ahandi anihondümbofe hohoanimoye rani-süngumbo wambo,’ meho. *Stat 15:6*

<sup>4</sup>Sihiri fifirihundi ra, nindou ai nine ratūpuri ratūpurayu ana, ai rani takini kaki semündūh-ani. Ahandi kaki ra moani sabudowani semündūhūyupoani, ŋga sapo ai ratūpurimayu rani takinimbo asabudo-ane. <sup>5</sup>Ŋga asu nindou düdi ai ahandi ratūpuri ranahambo hohoanimokoate-yuwohū asu ai moani God sapo nindou hohoanimo moaruwaimbü aheimbo nindou mbumund-anei ehu ranahambo anihondūmboariri ana, asu ai ahandi anihondūmbofe hohoanimo ranahambo mbumundi hohoanimo-ane yahu arandi. <sup>6</sup>Nindou rahurai-ane God ai ahambo mbumundi nindou-ani ehu, ŋga moai ahandi ratūpurimbohūnda, nindou ranai hihifi-hihifūmbi nindou-ani yahu. Ŋga Defit amboa ranahambo hoafimayu. <sup>7</sup>Ai yare hoafiyuhū yahuya,

‘Nindou ai hihindi hohoanimoyeiani asu God ai amboawiyei yahuhū ahei moaruwai hohoanimo ranahambo gabudareandi, nindou ranai ana hihifi-hihifūmbi nindou-anei.

<sup>8</sup>Nindou ai moaruwai hohoanimoyuwani asu Adūkari ai ranahambo hohoanimokoate-ayundo ana, nindou ranai hihifi-hihifūmbi nindou-ani,’

*Buk Song 32:1-2*

mehu.

<sup>9</sup>Sapo hihifi-hihifi hohoanimo ranahambo Defit hoafimayu ra, nindou fihoeari kefe tirihefe hohoanimo süngurundeimbi ranaheimbo yanggiriyu hoafimayu? Wani. Ŋga nindou fihoeari kefe tirihefe hohoanimo süngufekoate-aye ranaheimbo kameihiyu ai yare hoafimayu. Ŋga sihiri rarihu fifirihundi ra, God ai Abrahamindi anihondūmbofe ra hoeireandani mayoa ahambo nindou mbumund-ani mehu, asefi. <sup>10</sup>Ŋga nüngusūmboaniyo rani-moatūkuni ra ahambo tüküme Feyowa? Abraham ai ahandi fihoeari ra kefe tirihefekoate-yuwambeyo asu kare tirihai hayamboyuwambeyo God ai ahambo yare hoafimayundo ra? Sapo ai fihoeari kefe tirihefekoate-yuwambeyo, ŋga süngunambo-yopoani. <sup>11</sup>Ai ahandi fihoeari ra kefe tirihefekoate nünguambe Godimbo anihondūmbo-marira asu God ai ahamboya se nindou mbumund-anafi mehundo. Ra nafuimbohūnda God ai ahambo fihoeari kefe tirihefe hohoanimo masagado. Ranimboani Abraham ai münguambo nindou moai fihoeari ahei ra karihi tirihehindisi, ŋga asu ai Godimbo anihondūmbo-arihori ranahei amoao amboanayu. Ranimbo-hündamboyo asu God ai aheimbo amboani se nindou mbumund-anei mehündüri. <sup>12</sup>Nindou bidifiri ai fihoeari karihi tirihehi-ndeimbi yanggiri-yeipoani, ŋga anihondūmbo-rihindeimbi kapeih-anei asu sihefi amoao Abrahamindi anihondūmbofe hohoanimo süngurihi arihūndi. Asu horombo Abraham ahandi fihoeari kefe tirihefekoate-yuambe anihondūmbo-mareandi rani-süngumefundi ranimbo-hündamboani ai ahei amoao-ayu.

**Godindi horombo hoafi ra münguambo  
anihondūmbo-rihindeimbi-yafe-ane**

<sup>13</sup>God ai Abraham asu ahandi amoao mami ranaheimbo hifi münguambo ra ndahandürimboyahi yahuhaya horombo hoafimareandüri.

God ai ahambo rani hoafi ahinümbi hohoanimo süngufembo rani-sünguyopoani ai horombo hoafimareandi. Iḡga Abraham ai Godimbo anihondümbomarirambo asu God ai nindou mbumund-ani mehundo. Iḡga rani-süngumbo rani-moatükuni semindimbo God ai horombo hoafi ra hoafimeindo. <sup>14</sup>Sapo nindou ai ahinümbi hohoanimo ra sünguri-hündeimbi-maye ai yangiri Godindi muḡgu-moatükuni ra asahümündi ana, asu anihondümbom hohoanimo ra moani niḡgombo nou-ane. Asu Godindi horombo hoafi ranamboani yafui hoafi yangiri nou-ane. <sup>15</sup>Sapo ahinümbi hohoanimo ra yangorühi asu Godindi ḡginindiyowohü tiḡirifo saimbo hohoanimo ai-amboa yangoromboane. Iḡga asu ahinümbi hohoanimo ra yangorikoate-yowohü asu ḡgiri nindou ai ahinümbi hohoanimo ranahambo süngufekoate-aye mbisefi hoafindefi.

<sup>16</sup>Ranimboane asu rani-moatükuni ranahambo sapo God ai saimbo horombo hoafimareandi ra anihondümbofe hohoanimomayo rani-süḡgu tükefeyo. Ranimbo-hündambo-animbo rani-moatükuni ra sapo ahandi hipoambofe hohoanimomayo rani-süḡgu yangir-ane tükefeyo. Nindou didiyei sapo ahinümbi hohoanimo ranahambo süḡguarihindi ranaheimbo yangiriyopoani, ḡga nindou sapo anihondümbomarihindi ana, Abraham ai anihondümbomareandi nou ai-amboani ra ndahümündimboyeisi. Abraham ai ana muḡguambo sihefi amoa nahurai-ani. <sup>17</sup>Raniyo Bukambe hoafi ranai yare hoafiyowohü yahoya, ‘Ro sihambo afindi hifi hifi nindou ranahei amoaombeyafa sahehea hiniḡgi-mariheanini,’ meho. Raniyo rani hoafi ra anihond-ane nimboe sapo God ahandihoari hoafimayu. Abraham ai Godimbo anihondümbomariri ranai-ani nindou yifihündi yangiri botire asu nine-moatükuni muḡguambo tüküfekoate ra ahandi hoafi süḡgu hoafi yangiri moani aimbore tüküfe arandi.

<sup>18</sup>God ai Abrahamimboya, ‘Sihafi amoa mamia ana tapuiyowa ḡgiri kikindeandi,’ mehundo ra ai moai fifireandi nünḡgunde rani-moatükuni ahambo tükümandife. Iḡga Abraham ai rani hoafi ranahambo himboriyu haya Godimbo anihondümbomarihimi himbomayu hu. Ranimboane asu nindou afindi hifini ranahei amoa tükümeḡfiyu God ai yare hoafimayu nou. <sup>19</sup>Abraham ai ndeara 100 himbani boagiri safiyusi, ḡga asu Godimbo anihondümbomfimbo hohoanimo ranai moai warambe hoafireri ahandi fi ranai ndeara akimi yifimbo yangiriyowambe ra. Asu ahandi nimorehi Sara amboani ahandi fi ra ndeara boagiri-yowohü wambo ḡgiri nimori wakindamindo. <sup>20</sup>God ai Abrahamimbo mamia moatükuni ndahandomboyahi yahuhaya horombo hoafimendu ranimbo moai yimbumbore hohoanimoyu, ḡga Godimbo ḡginindi anihondümbomarihimi aboed-ani mehu. <sup>21</sup>Raniyo ai nine hoafi God ahambo randiheamboyahi mehu ranimbo anihondümbom ai randeambui yahuhaya himbomayundo. <sup>22</sup>Ai yare hohoanimomayu-wambo asu God ai ahamboya, ‘Seana mbumund-anafi wandi himboahü,’ mehundo.

<sup>23</sup>Baiborambe yare hoafiyowohü yahoya, 'God ai ahambo nindou mbumund-anafi wandi himboahü,' mehu ra Abraham ahambo yanggiri hamindi hoafiyumbo-yupoani, nga wani. <sup>24</sup>Ŋga rani hoafi ra sihefimbo kameihyu hoafimemuni. Sihiri sapo God Sisas sihefi Adükari ranahambo yifihündi botimariri ranahambo-animbo anihondümbo-ndihurimboane. Rananimbo asu God ai sihefi anihondümbofe hohoanimo ranahambo hoafinduhüya rani anihondümbofe ranana mbumundi hohoanimo nou-ane mbüsümbui. <sup>25</sup>God ai Sisas ranahambo hifi ndanihü yifimbohünda koamarisherü ra sihefi moaruwai hohoanimo ranahambo gogori-hefembohündamboyu. Asu God ai asükaiyu yifihündi botimariri ra sihefimbo wandi himboahü nindou mbumund-anei yahomböhündamboyu botimariri.

### God ai sihefimbo nindou mbumund-anei ehumuni

**5** <sup>1</sup>Sihefi anihondümbofe hohoanimo ranimbo-hündambo God ai sihefimbo nindou mbumund-anei ehumuni. Ranane asu haponda sihiri sihefi Adükari Sisas Kraisindi süngu-ane fi God-babidimbo aboedi-aboediyahumboayefi. <sup>2</sup>Sihefi anihondümbofe hohoanimo ra Adükarindi sünguyo nafi megorowa sihiri Godindi moani hipoambofe ranambe kefoehu animboefi. Ranane fi asu sihiri God ai sihefimbo semindimunani asu ahandi sürühoeimbi himboamupui-randeimbi ranahambo semindimbo anihondümbo-rihundühi hihifi-hihifiyefühi himboayefi. <sup>3</sup>Asu ranahambo yanggiri yefipoani hihifi-hihifiyefi arihundi, nga wani. Ŋga nine tinjirifo sihefimbo-so tükefeyo ranahambo kameihanefi hihifi-hihifiyefi arihundi. Ŋga sihiri fifirihundi tinjirifo tükefeyomuni ranai moanane yaho hohoanimo ra sünguarandi. <sup>4</sup>Asu moanane yaho hohoanimo ra nginindi ningombo hohoanimo sünguarandi. Asu nginindi ningombo hohoanimo ra Godimbo anihondümbo himboyondombo hohoanimo sünguarandi. <sup>5</sup>Asu sihiri rarihu yahurai anihondümbo himboayefi hefi ana, asu ngiri ngusüfoambe moaruwaindamuni, sapo God ai sihefimbo Yifiafi Aboedi semuni mbura rani-süngu ahandi-mayo ngusüfo pefe hohoanimo ra sihefi ngusüfoambe botimareamuni wambo.

<sup>6</sup>Ŋga horombo sihiri nginindi ningokoate-yefambe rani-simboani God ai kamafoareandi nindou ahambo daboadi hihirihi-rihündeimbi ranaheimbohünda Krai ai yifimayu. <sup>7</sup>Nindou mbumundi hohoanimoyeimbi amboani ngiri ahamböhünda yifimbo hohoanimondu. Ŋga nindou mamami ai nindou ngorü aboedi-mayu ranahamböhünda yifimbo hohoanimomandüyo asu wanimandüyo. <sup>8</sup>Ŋga asu sihiri moaruwai hohoanimo süngu yanggiri süngurihundühi nimboefambe Krai ai sihefimbohündambo yifimayumuni. Raninambo asu God ai sihefimbo ngusüfo pamareamuni ra nafuiyumuni arandi. <sup>9</sup>Ranana asu haponda

Kraisindi hori rani-sungu God ai sihefimbo ai mbumund-anei ehu ana, asu sihiri fifirihundi ahandi sungu Godindi hürütü ranambehindi aboedambo-ndahumboyefi. <sup>10</sup>Horombo ana sihiri Godindi hürütümbiyefi, nga asu hapondani ana Godindi Nimori yifimayu rani-sungumboyo Godbabidi ngunindimbore hiningimareamuni. Asu haponda sihiri ahandi yifi sungu ndarihu Godindi ngunindayefi ana, sihiri fifirihundi ra ahandi yanggiri ningombo hohoanimo rani-sungu aboedambo-ndahumboyefisi. <sup>11</sup>Ngga asu rani yanggiryopoani, nga sihiri sihefi Adükari Sisas Kraisindi sungu Godimbo hihifi-hihifiyahu-ndowohanefi. Ranahandi sungu sihefimbo Godindi ngunindimbore hiningimareamuni.

**Adam ai yifi hohoanimo nimindihüyu asu Kraisi ai  
yanggiri ningombo hohoanimo nimindihüyu**

<sup>12</sup>Nindou mami ranahandi sunguyo hohoanimo moaruwai ranai hifi ndanihü tüküme Feyo. Ngga moaruwai hohoanimo ranai yifiyorambo hohoanimo rani dibore tüküme Feyo. Raniyo asu yifi hohoanimo ranai munguambo nindou ranaheimbo-so tüküme Feyo sapo munguambo nindou moaruwai hohoanimomayei ranimbo. <sup>13</sup>Ngga ahinümbi hohoanimo tüküfekoate-yowambe moaruwai hohoanimo ranai hifi ndanihü mengoro-ane. Ngga asu ahinümbi hohoanimo yanggorikoate-yowambe ana, moaruwai hohoanimoyeiani ra moai ranahambo hoafi yanggori randi. <sup>14</sup>Ngga anihond-anesi, horombo Adam ai nunguwambe peyo haya ho-hombo Moses nunguwambe tüküme Feyo ranambe ana munguambo nindou ranaheimbo yifimbo hohoanimo ranai hifandimarandüri howa yifisafimayei. Nindou bidifiri Adam moaruwai hohoanimomayu ai moai rahurai rahindisi, nga aheimbo yifimbo hohoanimo ranai hifandimarandüri.

Adam aiana Nindou sunguna tüküfemboayu ahandi sisami nahuraiyu ramefiyu. Ngga asu nindou yimbu ahafandi hohoanimo ra nggorü-poani nggorü-poanimboyo. <sup>15</sup>Ngga Godindi moani saimbo moatükuni ranana Adamindi moaruwai hohoanimo rahurai simogodiyopoani, nga wani. Ngga nindou mami ahandi moaruwai hohoanimo sungu nindou afindi yifiyei marihündi. Ngga asu Godindi moani hipoambofe hohoanimo, moaruwai hohoanimo ra afindi ngasündareandi. Ngga Nindou mami Sisas Kraisi ahandi moani hipoambofe hohoanimo sungu moani saimbo moatükuni nindou afindi ranaheimbo tüküfe marandi. <sup>16</sup>Ranane asu Godindi moani sai moatükuni asu nindou mami ahandi moaruwai hohoanimo ra nggorü-poani nggorü-poani reamboayo. Ngga nindou mami ahandi hohoanimo moaruwai ranahandi sunguyo God ai nindou aheimbo papi-hoafirirühi aheimbo hüti-anei mehu. Ngga asu Godindi moani sai moatükuni ranahandi sunguyo nindou hohoanimo moaruwai afindi ramarihindisi, nga asu God ai aheimbo nindou mbumund-anei wandi

himboahü mehündüri. <sup>17</sup>Ŋga sapo nindou mami ranahandambohöndi ahandi moaruwai hohoanimo süngu yifi hohoanimo ranai tükife haya hifandarandüri. Ŋga asu nindou didiyei Godindi-mayo moani hipoambofe afindi safi ranane asu ahandi moani sai moatükuni sapo mbumund-anei ehu hoafi ranane ra asahümündi ranai yanggiri nimboeimbo hibadihömboyei.

<sup>18</sup>Ranane asu nindou mami ahandi moaruwai hohoanimo ranimbo-hünda münguambo nindou ranaheimbo God ai se hütiyei, ŋga ranimbo-hünda moaruwai-mbeyeiamboane mehu hoafi ra tüküme Feyondüri. Mare yahurai-ane Nindou mami ahandi mbumundi hohoanimo ranimbo-hünda münguambo nindou ranaheimbo Godindi himboahü se mbumundi nindou-anei hoafi ranane asu yanggiri ningombo hohoanimo-ane münguambo tüküme Feyondüri. <sup>19</sup>Nindou mami ai Godindi hoafi süngufekoate-mayu asu ranimbo-hünda nindou afindi ranai hohoanimo moaruwaiyeimbi tükümehindi. Mare yahurai-ane Nindou mami ai Godindi hoafi süngure haya asu ranimbo-hünda nindou afindi ranai Godindi himboahü hohoanimo mbumundiyeimbi nindou tükündahimboyei.

<sup>20</sup>Ahinümbi hohoanimo moaruwai hohoanimo ratüpuri afindi tüküfembohünda tüküme Feyo. Ŋga asu moaruwai hohoanimo ranai afindi tüküme Feyo-wamboyo Godindi moani hipoambofe hohoanimo ranai afindi hamindi tüküme Feyo. <sup>21</sup>Asu hoafi ra rahurai-ane, horombo moaruwai hohoanimo ranai nindumbo hifandimarandüri asu rani-süngu yifi hohoanimo tüküme Feyondüri. Mare yahurai-ane haponda Godindi moani hipoambofe hohoanimo ranai nindumbo hifandirandüra rani-süngu nindou Godindi himboahü mbumundi tükehindi. Ranihönd-ane yanggiri koadürümbo animboei sihefi Adükari Sisas Kraisindi süngu.

**Moaruwai hohoanimo süngumbo yifimbo nahurai-  
mayefi, ŋga Kraisindi süngu yanggiri animboefi**

**6** <sup>1</sup>Asu refe ana sihiri nüngu mambisefa? Sihiri moaruwai hohoanimo ranai yanggiri randihu ŋgefa Godindi moani hipoambofe hohoanimo ranai afindi tükümbifeyo-wamboane, mbisefi hoafimandefiyo? <sup>2</sup>Rani-moatükuni ra ai ngiri randifeyo, ŋga wani! Sapo sihiri moaruwai hohoanimo ranahambo yifi nahuraimayefi. Asu nüngundi hu moaruwai hohoanimo ra süngumandihu ŋgefa? <sup>3</sup>Sihiri Sisas Krai-babidi nimboefimbo yefi himoni hundürimayefi ra. Ranana asu sihiri ai-babidi yifimayefi ra se moai fifirihindiyo? <sup>4</sup>Sihiri himoni hundürimayefi ra ai-babidimbo yifiyefa asu ai-babidimbo masamboareamuni nou-ane. Ranimbo-hündambo Apendi ŋginindi afindi raninambo Kraisimbo yifihündi botimariri yahurai-ane asu sihiri amboani simbori hohoanimo yanggiri süngundihumboane.

<sup>5</sup> Sihiri ai-babidi mami yifimayefi sapo ai yifimayu nou. Ranana asu sihiri ai-babidi mami yifihüendi botindahumboane ai botimefiyu nou.

### **Sihiri Krai-babidi yanggiri nimboemboyefi**

<sup>6</sup> Asu sihiri fifirihundi nda, sihefi wamindafi hohoanimo ra ai-dibo nimi keimbi karihendeimbi fih yifimayo, moaruwai hohoanimo sapo sihefi fiambe hoanḡohü ratüpurio arandi ra ahandi ḡginindi ra raguambo-fembohünda. Asu ranimbo-hündambo ḡgiri sihefimbo moaruwai hohoanimo ranai hibadamuni ḡgo. <sup>7</sup>Ḳga nindou düdi ai yifayu ana, asu moaruwai hohoanimondi ḡginindi ranahambo aboedambofih-ani.

<sup>8</sup> Asu sihiri Krai-babidi yifi-yefeimbihüendi nouehundi ana, rani-moatükuni ra sihiri anihondumbo-rihu fifirihumboanefi, ranana awi sihiri ai-babidi yanggiri nimboemboyefi. <sup>9</sup> Krai ai yifihüendi botifi hayambo wambo asükaindu ḡgiri yifindu. Asu yifimbo hohoanimo ranai ḡgiri ahambo ahandi ḡginindinambo hibadiri ḡgo. Ḳga sihiri rani-moatükuni ranahambo fifirihumboanefi. <sup>10</sup> Sapo ai munḡambo moaruwai hohoanimo ra hifinambofembo mamimbo yanggiri yifimayu. Ḳga asu haponda ai yanggiri anüḡgu ranimbo kameihio. Ḳga haponda ai yanggiri anüḡgu ranana God-dibo-ani anüḡgu. <sup>11</sup> Mami rani-süḡgumbo-animbo se sihei fimbo hohoanimondei, se moaruwai hohoanimo ranahambo yifimayei nou asu ahandi ḡginindi hoarehi moai niboadei hei, ḡga wani. Ḳga se sihefi Adükari Sisas Krai ahandi süḡgu God-babidi yanggiri aniboadei.

<sup>12</sup> Rananimbo asu se sihei yifiyo-randeimbi fi ra moaruwai hohoanimo ranai hibadarümböe, ḡga yowani. Moaruwai hohoanimo ranai siheimbo hühündeirani asu se sihei wamindafi hohoanimo ahandi yifiri moaruwai ranahambo süḡgundihimboyei, ḡga yowani. <sup>13</sup> Asu se sihei fi mami bidifiri amboani moaruwai hohoanimo ranahambo hiniḡḡindowandani ndemindimboe. Mamikari hohoanimo moaruwai fifaniḡḡareimbi ra refembohünda hohoanimondeimboyei. Ḳga se siheihöari Godimbo ndahündo sapo se nindou yifihüendi botifi yanggiri anüḡgu nou-anei. Asu sihei bidifiri fi munḡambo ra ahambo hiniḡḡindihindo mbumundi hohoanimo refembohünda. <sup>14</sup> Ḳga moaruwai hohoanimo ranai siheimbo hibadarü ḡgomboe, ḡga yowani. Nimboe sapo ahinümbi hohoanimo ahandi hoarehi se moai niboadei, ḡga se Godindi moani hipoambofe hohoanimo ranahandi hoarehi animboei.

### **Sihiri ana mbumundi hohoanimondi moani ratüpuriyefi-rihundeimb-aneffi**

<sup>15</sup> Ranana asu sihiri ra nüḡḡumandahuwa? Haponda sihiri ahinümbi hohoanimo menḡoro rani hoarehi niḡḡokoate, ḡga sihiri Godindi moani

hipoambofe hohoanimo rani hoarehi animboefi. Asu ranimbo-hünda sihiri ra moaruwai hohoanimondefi mandihundiyo? Rani hohoanimo ra sihiri ngiri randihundi, nga wanane! <sup>16</sup>Se nindou ngoründi hoarehi niboadeimbo ahandi hoafi himboraye ana, asu se ahandi moani ratüpurিয়ে-rihündeimbi nahurai-anei. Asu se moai ranimbo fifirihindiyo? Se moaruwai hohoanimondi hoafi sünguarihünda ana, asu ranimbo yifindeimboyei, nga se Godindi hoafi sünguarihünda ana, asu ranimbo ahandi himboahü mbumundi nimandeimboyei. <sup>17</sup>Yini, horombo ana se moaruwai hohoanimo ranahandi moani ratüpurিয়ে-rihündeimbi nindou manimboei-anei. Nga asu hapondani ana se anihondü yamundife hoafi masahümündi ra sihei muṅguambo hohoanimo ra süngurihindühanei. Nga ranimbo-hündambo-animbo God ahambo hihifindihurimboane! <sup>18</sup>Seana moaruwai hohoanimondi nginindi ranambeahindi aboedamboyah hehimboane asu mbumundi hohoanimo ranahandi ratüpurিয়ে-rihündeimbi nindou-yahimboane. <sup>19</sup>Rani hoafi ranai himborimbo siheimbo tiṅümb-ane ranimboane asu ro moani nindou sihefi hohoanimonambo ndarihe hoafayahandüri. Horombo ana sihei fi ra moaruwai hohoanimo refembohünda rarihi hiniṅgirihi hehimbo moaruwai hohoanimo ra rasüngumarihi hei. Mami yahurai-ane hapondani ana sihei muṅguambo fi ra randihi hiniṅgindihindi mbumundi hohoanimo asu sürühoeimbi hohoanimo refembohünda.

<sup>20</sup>Horombo se moaruwai hohoanimo ranahandi ratüpurিয়ে moani ratüpurিয়েambe se moai aboedi mbumundi hohoanimo ranahandi ratüpurিয়ে-rihündeimbi niboadei. <sup>21</sup>Amoaningeimbi moatükuni se ramarihinda ra-süngumbo asu nine moatükuni aboedi tükümefoyowa? Hohoanimo ranihünda yifi yanggir-ane tükefe arandi. <sup>22</sup>Nga hapondani ana se moaruwai hohoanimo ranambeahindi aboedamboyah tüküyahi hehi Godindi moani ratüpurিয়ে-rihündeimbi yanggiri nindou tüküyahimboane. Hohoanimo ranihünda se sürühoeimbi hohoanimo sahümündi asu yanggiri koadürümbo-koadürümbo niṅgombo hohoanimo ra tüküfeyondüri arandi. <sup>23</sup>Nga moaruwai hohoanimo ra ahandi ratüpurিয়ে-rihündeimbi ahei ratüpurিয়ে süngu rani takini sagadüri arandi, sapo takini ra ai yifi hohoanimo ranane. Nga asu God ai moani sihefimbo sai arandi ahandi moani saimbo moatükuni ra sapo yanggiri koadürümbo niṅgombo ranane, sihefi Adükari Sisas Kraisindi süngu.

### Simbori hohoanimo süngufe

**7** <sup>1</sup>Wandafi mami, ro haponda nini hoafiyo hoafimbo sa heheamboayah nda, se fifirihimboane sapo seana muṅguambo hifinindi ahinümbi hohoanimo meṅgoro ra fifirihi hehimbo wambo. Nindou ai yanggiri niṅguambe yanggir-ane ahinümbi hohoanimo ranai ahambo hifandiriri arandi. Nga nindou ai yifinduwani, ahinümbo

hohoanimo ranai ana ngiri asükaindo ahambo hifandindiri. <sup>2</sup>Mami moatükuni yahurai-ane, nimorehi mami ai ahandi nindowenihi anüŋgu ana, ahinümbi hohoanimo ranai ahambo ahandi nindowenihi ra-dibo kikihiramindoani ai moani ahandi nindowenihi-dibo yanggiri niŋgomboane. Ŋga asu ahandi nindowenihi ai yifayu ana, asu ahinümbi hohoanimo nindowenihi ahandi rani-dibo kikihimaramindo ranai rani hohoanimo ranambeahindi hiniŋgireamboane. <sup>3</sup>Ahandi nindowenihi nünŋuani nindowenihi ngorü-diboefeyo ana, nimorehi ranahambo nindowenihi birabiriyo-randeimb-ane mbisei. Ŋga asu ahandi nindowenihi ranai yifiyuwani, nimorehi ranai nindowenihi ngorü aserimindo ana, ai nindowenihi birabiriyohi-yopoani, sapo ai ahinümbi hohoanimo meŋgoro ranambeahindi hiniŋgire tüküfe hayambo wambo. <sup>4</sup>Wandafi mami, mare yahurai hohoanimo-ane siheimbo-so amboani eŋgorondüri. Seana Krais-babidi niboadei hehi asu ranimbo-hünda ai-babidi yifimayei nou. Raninambo asu ahinümbi hohoanimo ranai siheimbo moai kikihira-mündündüri. Ranimbo wambo asu se hapondani ana nindowenihi ngorü sahorimindeimbo nahurai-anei sapo God ai yifihünda botimareir-ane sihiri aboedi hohoanimo ra süngufembohünda. <sup>5</sup>Ŋga horombo sihiri wamindafi hohoanimo ranambe nimboefambeyo ahinümbi hohoanimo meŋgoro ranai sihefi findi moaruwai hohoanji hohoanimo botireamuna asu sihiri raninambo moaruwai hohoanimo ratüpuru aho ra rarihu marihundi. Asu hohoanimo ra yifi hohoanimo yanggir-ane yare marandi. <sup>6</sup>Ŋga asu hapondanambe ana sihiri yifiyefi mburihumbo ahinümbi hohoanimo kikihamindimuni maniŋgo ranambeahindi hiniŋgi-rihumboanefi. Ranimboane asu hapondani ana sihiri moai wamindafi ahinümbi hohoanimo sürü paru masihoemo rani-süngurihu ratüpuruyefi, ŋga sihiri Yifiafindi-mayo simbori hohoanimo rani-süngurihu ratüpuruyefi arihundi.

#### **Moaruwai hohoanimo ai sihefimbo moaruwaimbo-mareamuni**

<sup>7</sup>Asu ranimbo sihiri nünŋumambisefa? Ahinümbi hohoanimo ra moaruwai hohoanimoyo? Ranana ai wani! Ŋga ahinümbi hohoanimo meŋgoro ranaiyo wambo moaruwai hohoanimo ranahambo hoafiyowohü nafuimendira ro fifirimariheandi. Rani-moatükuni ra yahurai-ane: Ahinümbi hohoanimo ranai hoafiyowohüya, se nindou ngoründi napo hohoanji-ndowamboyafi, hoafi ra nafuiyondirihü hoafiyondirikoatembe-mbonana, asu ro ngiri nindou ngoründi napo hohoanife hohoanimo ranahambo fifiriheandi. <sup>8</sup>Ŋga moaruwai hohoanimo ranaiyo ahinümbi hohoanimo hoafi rani süngu nafi ranahambo kokofoare semindi haya asu ai wandi ngusüfoambe mamikarambo hohoanifeimbi hohoanimo ranahambo botire marandi. Ahinümbi hohoanimo ranai yanggorikoate-mbembonana, asu moaruwai hohoanimo ranai ngiri

nginindiyo. <sup>9</sup>Horombo ana ro ahinümbi hohoanimo ra fifirifekoate-yahambe yanggiri aboedi manimboahi. Iŋga asu ahinümbi hohoanimo hoafi ranai tüküfihüyo wambo-so, moaruwai hohoanimo ranai yanggiri botife maningowa asu ro yifiyambo nahuraimayahi. <sup>10</sup>Asu ahinümbi hohoanimo ranai nindou yanggiri niŋgombo hohoanimo saimbo ra nimindühiyo, ŋga asu ahinümbi hohoanimo rani-süŋgu moai yanggiri niŋgombo hohoanimo sai-randi, ŋga sihafi moaruwai hohoanimo süŋgu yifindafi yaho marandi. <sup>11</sup>Iŋga moaruwai hohoanimo ranai ahinümbi hohoanimo hoafi rani-süŋgu ahambo kokofoare masemindo ranahandamboyo hoafi ranai wambo yirimo-marandira asu ro rani-süŋgumaritheanda wambo moaruwai hohoanimo ranai hifokoa-mareandira ro yifiyambo nahuraimayahi.

<sup>12</sup>Iŋga asu ahinümbi hohoanimo mengoro ranai ana Godindi-mayo-ane. Asu ahinümbi hohoanimo hoafi ranai-amboani Godindi-mayo wambo mbumundiyo haya aboed-ane. <sup>13</sup>Iŋga asu ahinümbi hohoanimo aboedi ranai wambo ramareandira ro yifiyahai? Ai ra wani! Iŋga moaruwai hohoanimo aboedi moatükuni süŋgu ramareandira yifimayahi. Asu raninambo moaruwai hohoanimo ai moaruwai hamindi moatükun-ane ra weindahimefeyo. Ranimboane asu ahinümbi hohoanimo rani-süŋgu sihiri ndondihu fifirindihumboane, moaruwai hohoanimo ranana ai muŋguna moaruwai hamindi moatükun-ane.

**Moaruwai hohoanimo ai sihefi hohoanimo  
ranahambo kikihami-ndimboane**

<sup>14</sup>Sihiri fifirihundi, ahinümbi hohoanimo ranana Godindi moatükun-ane. Iŋga asu roana sümbuyo-randeimbi fiambeahindi nindou-anahi. Rananahi asu moaruwai hohoanimo ahandi hoarehi nimboamboyahi ahandi moani ratüpuriya-rihandeimbi-mayahi. <sup>15</sup>Roana ratüpurayahi ranahambo fifiriheandühi-yahipoani, ŋga wani. Iŋga ro hohoanimo refembo yifirayahi ra moai rarihe rihandi. Iŋga hohoanimo yiboarukoayahi ra asu ro rarihe rihandühanahi. <sup>16</sup>Nine-moatükuni ro refembo yiboarukoayahi ra rawariheandi. Asu ro rarihe hoafiyahühiya, ahinümbi hohoanimo ranana anihondü aboed-ane sa arihandi. <sup>17</sup>Asu ro rani-moatükuni ratüpuriya arihandi ranana wandi-hoariyahipoani. Iŋga moaruwai hohoanimo wandi fiambe amaro ranai-ane moaruwai rani hohoanimo arandi. <sup>18</sup>Ro fifiriheamboanahi, wandi fiambe ana aboedi hohoanimo moai nimaro, sapo wandi wamindafi hohoanimo moaruwai ranambeahindi wamboanahi asahi. Iŋga ro aboedi hohoanimo ra refembo sa hehea hohoanimo-yahühanahisi, ŋga asu ro ŋgiri rani-moatükuni ra randiheandi. <sup>19</sup>Ro aboedi mbumundi ratüpuru refembo sahehea hohoanimoayahi ranana asu ro ŋgiri randiheandi. Iŋga asu nine moaruwai fifaniŋgarimbi hohoanimo ratüpuru ro refembo moei-asahi

ranane rarihe arihandi. <sup>20</sup>Ro moei saheimbi hohoanimo rawariheandi ana, ro wandihoari-yahipoani rani-moatükuni ra rawariheandi, nga wani. Nga sapo moaruwai hohoanimo wandi fiambe amaro ranai-ane wambo yaro yahoani rawariheandi.

<sup>21</sup>Ranane asu ro hoeiriheandani nine hohoanimo aboedi ra refembo sa heheamboyahani, asu fifaniŋgarimbi, moaruwai hohoanimo amaro ra aboedi hohoanimo ranahambo semindi gigiranambore arandi.

<sup>22</sup>Wandi hohoanimo ragu asaŋgoro ranai ana Godindi hohoanimo ranimbo yanggir-ane süngufembo hohoanimoya habodarihandi. <sup>23</sup>Nga asu ro hoeiriheandani hohoanimo ŋgorü wandi fiambe amaro asu ŋgorü hohoanimo ranai wandi fiambe ragu asaŋgoro rani-dibo simbori-simboriyafe arinandi. Ranane asu wandi fiambe moaruwai hohoanimo amaro ranahandi ratüpuri hohoanimo ranai wambo kikihamindindiri aningo. <sup>24</sup>Roana hihifi-hihifikoate nindou hamind-anahi! Nindou didai wambo yifimbo hohoanimo ranambeahindi aboedambo-mandeandira? <sup>25</sup>Godimbo hihifarihüni. Sihefi Adükari Sisas Kraisindi süngu ai wambo aboedambo-ndeandirimbui! Asu ndanana moani wandi hohoanimo-ane: Roana yanggiri Godindi hohoanimo rani hoarehi animboahi, nga asu wandi wamindafi hohoanimo ranai moaruwai hohoanimo ranahandi hoarehi niŋgombo ahandi hohoanimo ratüpuriyo ho arandi.

#### Yifiafi Aboedindi süngu yanggiri niŋgombo hoaf-ane nda

**8** <sup>1</sup>Ranimboane asu haponda nindou didiyei Sisas Krai-babidi animboei aheimbo ana se hütiyei, nga yifindeimboyei yaho papi-hoafi ra moai yanggoro, nga wani. <sup>2</sup>Nga Krai Sisasindi süngu yanggiri niŋgombo sai-randeimbi Yifiafi Aboedindi hohoanimo ranai wambo moaruwai hohoanimo-ane asu yifiyorambo hohoanimo-ane ranambeahindi hümarihendira aboedambo-meheandi. <sup>3</sup>Ahinümbi hohoanimo ranimbo fifirifembo rani-süngu sihiri moai moaruwai hohoanimo ranahambo aboedambo-yahundi sapo wamindafi hohoanimo sihefi ra ŋgiri ahinümbi hohoanimo ra süngundihüendi, nga ranimbo wambo. Nga asu rani-moatükuni ra ahinümbi hohoanimo ranai ŋgiri randeandi, rani-moatükuni ana God ai ahandihoariyu ramareandi. Sapo ai ahandi Nïmori mami koamariheira nindou sihiri moaruwai hohoanimoyefeimbi sihefi fi himboyimbü tüküfi manüngu. Nïmori ra moaruwai hohoanimo ahandi ŋginindi müngufembo-hündamboyu kusü yifimayu. <sup>4</sup>Mbumundi hohoanimo ahinümbi hohoanimo ranahambo hoafayo ranai sihefi fiambe tükümbifeyo-wamboane yahuhayamboyu ai rani moatükuni ra ramareandi. Ranimbo-hündambo haponda nine hoafi ahinümbi hohoanimo ranai mbumundi hohoanimo ranahambo hoafayo, ra sihiri süngundihumboyefi. Sapo Yifiafi Aboedi ranahandi hohoanimo rasüngu hefi arihundi, nga wamindafi hohoanimo sihefi fiambe amaro ra moai süngurihundi.

<sup>5</sup>Nindou didiyei wamindafi hohoanimo süngu ahahabodei ranai ana wamindafi hohoanimo ranahambo yangiri hohoanimo-yeihanei. <sup>6</sup>Ŋga asu nindou didiyei Yifiafi Aboedindi hohoanimo süngu ahahabodei ranai ana Yifiafi Aboedindi moatükuni ranahambo yangiri hohoanimo-yeihanei. <sup>6</sup>Nindou ahandi hohoanimo wamindafi ranahambo yangiri hohoanimoayu ana, ai yifindimbui. <sup>7</sup>Ŋga nindou Yifiafi Aboedindi hohoanimo ranahambo yangiri hohoanimoayu ana, yangiri niŋgombo hohoanimo asu ŋgusüfoambe afurife kifeimbi hohoanimo rani yangiri ndemündü nünğumbui. <sup>7</sup>Ŋga nindou wamindafi hohoanimo sünguareandi ana, Godindi hürütümb-ani nimboe ai ahandi ahinümbi hohoanimo rani hoarehi ŋgiri nünğu. <sup>8</sup>Nindou didiyei ai ahei wamindafi hohoanimo ranahambo süngurihindühi ahahabodei ranai God ai refembo yifirayu ra ŋgiri randihindi. <sup>9</sup>Ŋga asu seana sihei wamindafi hohoanimo moai süngurihindi. <sup>9</sup>Ŋga Godindi Yifiafi sihei fiambe amaro ana, se Yifiafindi hohoanimo ra süngundihimboyei. Asu düdi ai Kraisindi Yifiafi ra ahandi fiambe nimarindokoate-ayo ana, nindou ranai Kraisindiyupoani, ŋga wani. <sup>10</sup>Ŋga Krais ai sihei fiambe amaru ana, sihei fi ranana moaruwai hohoanimo ranimbo-hündambo yifindowohü sümbondimboesi, ŋga sihei yifiafi ranai ana yangiri aboedi niŋgomboe sapo se Kraisindi süngu Godindi himboahü mbumundiyeihi wambo. <sup>11</sup>Sapo God Sisasimbo yifihündi botimariri ahandi Yifiafi ranai sihei fiambe amarondüri ana, asu mare God Kraisimbo yifihündi botimariri ranai süngunambo ahandi Yifiafi rani-süngu sihei yifiyo-randeimbi fi ranahambo yangirindeambui.

#### **Yifiafi Aboedi ai Godindi nimorimbo-areamuni**

<sup>12</sup>Ŋga ranimboane wandafi mami, sihiri Yifiafi Aboedindi hohoanimo ra süngundihumboane, ŋga sihefi wamindafi hohoanimo ai hoafemuni ra ŋgiri süngundihu ŋgefi. <sup>13</sup>Ŋga se sihei wamindafi hohoanimo rani-süngu ahabodei ana, se yifindeimboyei. <sup>13</sup>Ŋga asu se Yifiafi rani-süngu sihei fiambe moaruwai hohoanimo amaro ra hiniŋgarihindi ana, asu yangiri aboedi nimboeimboyei. <sup>14</sup>Nindou didiyei Godindi Yifiafi nafuiyandürani süngurihi arihündi ranai ana Godindi nimor-anei. <sup>15</sup>Ŋga Yifiafi se masahümündi ranai moai siheimbo rareandüra se moani ratüpuriyei-rihündeimbi tüküyahindühi yihimboyei, ŋga wani. <sup>15</sup>Ŋga se sapo Yifiafi siheimbo Godindi nimorimbo reirani masahümündi rani-süngu sihiri Godimbo Ape yihoe fi Afindi sefuhanefi. <sup>16</sup>Yifiafi ranai-ane sihefi yifiafi-babidimbo sihefimbo ragu ŋgusüfoambe weindahi yare hoafiyowohüya, Se Godindi nimor-anei yaho arandi. <sup>17</sup>Asu sihiri God ahandi nimorimboyahu aniboade fi ana, süngunambo sihefi Ape God ai ahandi nimorimbo ahandi aboedi moatükuni diboniyu sihai giginimayu ra ndahumindemboye fi. Asu sihiri Krais-babidi tinjirifombü moatükuni

ai masemündu nou asahumindexi ana, aboedi ndüreimbi nimarimbo moatükuni ai-babidimbo ndahumündemboeyefi.

**Süngunambo aboedi ndüreimbi nimarimbo  
moatükuni ndahuminde-mboeyefi**

<sup>18</sup>Ŋga ro ranahamboanahi hohoanimoayahi nda, haponda ndani simboa sihiri tiñirifo afindi tiñirifoayefi habodefi ranana moanane. Ŋga Godindi aboedi ndüreimbi nimarimbo moatükuni sihefimbo weindahi tüküfemunimboayo ranana adükari hamind-ane. <sup>19</sup>Munġuambo moatükuni God nafimarandi ranai tüküfe yangori himboyowohü ai ahandi nimori munġuambo weindahi tüküfemboayo si ra tükümbifeyowa yahohaya himboayo. <sup>20</sup>Hapondanambe ana sapo munġu-moatükuni God nafimarandi ranai moaruwaimbofe buriyombo sümboyorandühane. Rani-moatükuni refe arandi ra ahandihoari hohoanimoyo hayambo refe-randühypoani, ŋga God ai ahandihoari hütü rani-süngundafoandi mehuamboane refe arandi. Ŋga asu aboedi moatükuni ranahambo himbondohü yagodomböe. <sup>21</sup>Süngunambo God nafimarandi ranai sümbuyo-randeimbi hohoanimo kikihamindi aningö ranambeahindi aboedambo-ndeambui asu rani-simboani ai Godindi nimorimbondahi tükündahi aboedi safi ŋingö ranambe keboehi nimboemboeyi.

<sup>22</sup>Ŋga sihiri fifirihundi horombo peyo haya ho-hombo hapondanambe ana munġuambo moatükuni God nafimarandi ranai nimorehi nimori wakemindimbo hoafiferandühi amaro nahurai himboyohü engoro. <sup>23</sup>Ŋga rani-moatükuni ra munġu Godindi warihü tükümeffeyowambo rani yangiriyopoani, ŋga wani. God ai ahandi-mayo Yifiafi sapo ahandi weangurühi moani saimbo moatükuni ŋgorü ra masemuni. Ŋga sihiri amboani kameihanefi raguambe ŋipoyefi habodefühi God ai sihefi fi ra ahandi nimorimboreamuni aboedambo-mbireamuni sefi hohu himboayefi habodefi. <sup>24</sup>Ŋga sihefi ranahambo anihondümbo asu himbombo hohoanimo ranimbo wambo God ai sihefimbo aboedambo-mareamuni. Ŋga asu nine moatükuni sihiri hoeirihundeimbi-mayo ranahambo tüküfeyoani hoeifembo sefi hohu himboayefi ana, rani himbo sihefi ra himbo hondüyopoani. Ŋga nindou didai hoeireandeimbi moatükuni ra tükündifeyoani hoendihea mbüsü haya himbomanda? <sup>25</sup>Ŋga asu sihiri nine-moatükuni hoeifekoate-yefeimbi himboayefi ana, moani sihiri sisikoate tükümbifeyowa mbisefi hohu hifandarihundi.

<sup>26</sup>Mare yahurai-ane nindou sihiri ŋginindi ningokoate-yefani Yifiafi ranai-amboani tüküfe farihemuni arandi. Sihiri moai wudipoapofe Godimbo didibafifembo fifirihundi, ŋga asu Yifiafi ranai ahandihoari sihefimbo farihemunühi Godimbo didibafifemuni arandi ra ŋgiri weindahi hoafindo. <sup>27</sup>Asu God, sapo nindou-yei ngusüfoambe hoeire-randeimbi-mayu, ranai Yifiafi ai hohoanimoyohü hoafimbo-

mayo ranamboani fifireandi. Iḡa Yifiafi ranai Godindi nindou ranaheimbohünda ahambo hoafiyondombo ahandi hohoanimo süngu yahohaya hohoanimoayo.

<sup>28</sup>Asu sihiri rarihu fifirihumboanefi, nindou didiyei ai God ahambo ḡgusüfo parihori arihündi ranaheimbo ana muḡgu-moatükuni tükifeyoani God ai rareandani aheimbohünda aboedi tükefeyo. Sapo ranaheimbo God ai ahandi hohoanimoyu masihendi süngu aheimbo mborai mehündüri. <sup>29</sup>Iḡa nindou didiyei God ai aheimbo horombonambo fifimareandüri ranaheimbo amboani diboniyu hiniḡgirimareandüri. Wandi nimorindi hohoanimo nahurai hondüre tükümbiyahindamboane asu ranahandi ana Nimori ranai nindou afindi ranahei amoḡgo nimorimbofi mbinüḡguwamboane yahuhayamboyu ramareandi. <sup>30</sup>Raniyu asu nindou didiyei God ai ahamböhünda diboniyu hiniḡgi-mareandüri ranaheimbo amboani ahambo sowanambo hombo mborai mehündüri. Asu nindou daboe God ai mborai mehündüri ranaheimbo amboani aiana wandi himboahü nindou mbumund-anei mehündüri. Asu nindou didiyei aheimbo mbumund-anei mehündüri ranaheimbo ai ahandi himboamupuimbo-randeimbi ra masagadüri.

### **Godindi hipoambo ai ḡgiri hiniḡgindeamuni**

<sup>31</sup>Rani-moatükuni ra God ai ramareandi ranahambo sihiri nünḡgumambisefa? God ai sihefimbo yare yahurai farihemuni arandi ra, asu nindou didi nimori ai sihefimbo moaruwaimbo-mandeamuna? <sup>32</sup>God ai moai ahandi Nimori ranahambo warambe kikihirimündu, ḡga ai muḡguambo sihefimbohünda koamariheira nimi keimbi karihendeimbifihi yifimayu. Asu ai sihefimbo ahandi Nimori ra asemuni ana, asu ai bidifiri muḡgu-moatükuni moani raniwami nandeamunümbui.

<sup>33</sup>God ai nindou wand-anei yahundüreimbihündi ranaheimbo ra, nindou didai hoafimandündüra? God ai ahandihoari animbo aheimbo hoafiyundürühiya, ai wandi himboahü ana mbumund-anei yahu arandi. <sup>34</sup>Asu nindou didai aheimbo papi-hoafiyondürühi se hitiyei asu ranimbo-hündambo se asübusi afindi ndahümündimboyei hoafi ra hoafimandündüra? Wani. Krais Sisas sapo ai yifiyu asu yifihündi yanggiri botifi mbura Godindi haḡgifoani anüḡgu, ai yanggir-ani sihefimbo farihefemunimbohünda Godimbo hoafiyu arandi. <sup>35</sup>Ranane asu nindou didai sihefimbo Kraisindi hipoambofe hohoanimo ranambeahindi yikürübü-mandeamuna? Asu nine tiḡirifo tükündifemunühane, asübusümbi hohoanimo-ane, nindou ai moaruwaimbo-ndihimunühane, wembombondefühane, safi yanggirindefühane, nini-moatükuni ai sihefimbo moaruwaimbo-femunimbo yahohaya aho-ane asu sihefimbo-so hifokoefe moatükuni tükündifeyowohane, rani-moatükuni ranai

sihefimbo Kraisindi ngusüfo pefe hohoanimo ranambeahindi yikürübü-mandeamuniyo? Wani. <sup>36</sup>Anihond-ane, yahurai rani-moatükuni sihefimbo tüküfearandi ra Buk Baibor ai ranahambo yare hoafiyowohü yahoya,

‘Sihambo-hündamboanefi ro moaruwaiambe yifimbo yangiri muṅguambo si ra hefi arihundi.

Roana sapo sipsip hifokoefembo sei hehi rawehindi nahurai himboyefomboanefi,’

*Buk Song 44:22*

meho. <sup>37</sup>Ŋga asu muṅguambo rani-moatükuni sihefimbo tükefeyomuni ai daboadan-ane, ṅga sapo Nindou düdi ai sihefimbo ngusüfo pamareamuni ranai ana farihemuni randani aboedi hamindi harihehu tüküyahundühanefi! <sup>38-39</sup>Ŋga Ro anihondümbo fifiriheandi, ṅgiri nini-moatükuni ai ahandi ngusüfo pefe hohoanimo ranambeahindi yikürübü-ndeamuni: Yifi hohoanimo-ane, yangiri niṅgo hohoanimo-ane, Godindi nend-anemo, sünambeahindi bogor-anei, hifinindi bogor-anei, nine-moatükuni haponda tükefeyo-ane, süṅguna tüküfemboayo-ane, nine-moatükuni nimoamo aniṅgo-ane, asu nine-moatükuni hifi hoarehi ragu engoro ranane. Nine-moatükuni muṅguambo God ai nafirandeimbihündi ranai ṅgiri Godindi ngusüfo pefe hohoanimo sihefi Adükari Sisas Kraisindi süṅgu ranambeahindi yikürübü-ndeamuni. Ŋga wani.

### Por ai Israerimbo afindi hohoanimo-ayundüri

**9** <sup>1</sup>Ro anihondümboanahi hoafayahi. Ro Kraisindi nindouya hehea ṅgiri ro tikai hoafindahi. Yifiafi Aboedi ai wandi ngusüfoambe hifandarandi asu wandi ngusüfoambe wandi hoafi ranahambo anihond-ane yahohane. <sup>2</sup>Ro wandi mamisiri Sudahündi nindou ranaheimbo muṅguambo si aho ra ngusüfo afindi kürüheandühi afindi hamindi hohoanimo amarondiri. <sup>3</sup>God ai wambo moaruwaimbo-reandira asu Israer, wandi mamisiri hondü, ai anihondümbo-rihindeimbi nindoumboyahi tükümbeyahi-mbonana ra aboed-ane sa. <sup>4</sup>Raniyu God ai Israer ranaheimbo wandi nimor-anei yahuhaya asu ai ahandi himboamupuimbo-randeimbi moatükuni ra hoeimarihindi. Asu God ai hoafi firamündü masihendi ranane asu ahinümbi hohoanimo ranane ra masahümündi. Asu Godimbo ndofe hohoanimombo hohoanimo ranane asu God ai horombo hoafire masihendi hohoanimo ranane ai ra masahümündi. <sup>5</sup>Amoao mami horombo weṅgurühi manṅgomo ranai ana ahei amoao mam-anemo. Suda ahei sirambeahiyo Krais ai nindoumbofi tüküfi manṅgu. Ranani asu Krais ai muṅgu-moatükuni burayo ranahei mbiroyu haya hifandarandi. Aiana God hond-ani, ṅga ranimbo-hündambo-animbo muṅguambo si aho ra ahambo Adükar-ani mbisefomboane! Anihond-ane.

**God ai ahandi nendi ranaheimbo wandanei ehundüri**

<sup>6</sup>Israerihündi munḡuambo Israerihündi hondüyeipoani. <sup>7</sup>Ἰḡga Godindi horombo hoafi ra moai peyo, ḡga wani. <sup>7</sup>Abrahamindi ahurimami ranai ana munḡuambo ahandi ahuri hondüyeipoani. <sup>7</sup>Ἰḡga sapo God ai Abrahamimbo yahuya, ‘Aisakindi ahurimami yanḡgir-animbo sihafi sirimbo-ndahimboyei,’ mehundo. <sup>8</sup>Asu ranane nindou Abrahamindi ahurimami ranai munḡuamboyoipoani Godindi nimori hond-aye, ḡga nindou ai Godimbo horombo hoafire masihendihündi tükümehindi rananei ai Abrahamindi ahuri hond-aye. <sup>9</sup>Ἰḡga Godindi horombo hoafi ranai ndare hoafimayo, ‘Sapo ro hoafiya masiheheandi rani-simboan-animbo ro asükainda tükündaheandühi asu Abrahamindi nimorehi Sara ai nindowenihi nimori nderimindimboe,’ meho.

<sup>10</sup>Ἰḡga asu rani yanḡgiriyoipoani. <sup>10</sup>Ἰḡga asu süngunambo Aisakindi nimorehi Rebekandi mboafu nimori yimbu afindi mami ranahandambo masepirimindo. <sup>10</sup>Ἰḡga ahafandi afindi mami aiana Aisak sapo sihefi amoao-ani. <sup>11-12</sup>Nimori yimbu tüküfekoate-yafandambe God ai nimori mami ranahambo dibonimayundo moani ahandi hohoanimonambo yanḡgiri hamind-ane. Sapo Godindi nindoumbo dibonimayu hohoanimo ra nindou nine rareanda tüküfemboyopoani, ḡga God ai ahandihoariyu nindoumbo kafaoriri hiniḡgiriri arandi. Ranimboane asu nimori yimbu ranai tüküfe nine ratüpuri aboediyo moaruwaiyo ra refekoate-yafandambeyu, God ai Rebekambo hoafiyundühi yahuya, ‘Amoḡḡo nimori ai akidandi hoarehi mbinüḡguwamboane,’ mehu. <sup>13</sup>Rahurai God ai ‘Sekopimbo ḡḡusüfo pamarihini, ḡga Isombo yiboaruko-marihini,’ mehu hoafi ra Bukambe yare hoafimayo.

<sup>14</sup>Asu ranimbo sihiri nüḡḡumambisefa? God aiana moai ndore ratüpuriyu-randi mambisefiyu? <sup>14</sup>Ἰḡgiri ra-mbisefi, ḡga wani. <sup>15</sup>Ai Mosesimbo yare hoafiyundowohü yahuya,

‘Nindou daboe ro wandi hohoanimonambo ahambo amboawi yahando-mboayahi ana, asu ro amboawi mbisahandomboyahi. Asu nindou daboe ro wandi hohoanimonambo hipoambo-fimboayahi ana, ro hipoambo-ndihinimboyahi,’

*Kisim Bek 33:19*

yahu hoafimeindo. <sup>16</sup>Ranahandamboane God ai nindou dibonayu ra nine-moatüküni nindou ai hohoanimoayu-ane asu rawareandi ranane rani hohoanimo süḡḡuyopoani, ḡga Godindi hipoambofe hohoanimo raninamboane dibonayu. <sup>17</sup>Ἰḡga Bukambe hoafi ranai God ai Isip-yafe nindou bogori Ferombo hoafimeindo ra yare hoafiyowohü yahoya, ‘Ro wandi ḡḡinindi ra munḡuambo nindou ranaheimbo nafuindahürani asu wandi ndüri ranahambo munḡuambo hifi ndanihü bokari-mbirihehind-amboane samboanahi. Ranimbo-hündamboane ro sihambo

bogorimbo-riheanini hiniŋgariheanini,' meho. <sup>18</sup>Asu ranimboane sihiri fifirihundi God ai moani ahandi hohoanimonambo yaŋgiri nindou daboe amboawi yahuhani, asu nindou daboe ahambo afindi-afindeimbi tükümbifiyu-wamboane yahuhaya ranahambo randeandani afindi-afindeimbi tükündifimbui.

### Godindi ŋginindi hohoanimo asu hipoambofe hohoanimo

<sup>19</sup>Ranimbo-animbo nindou mami se hoafi-ndafindirühi animboya, asu refe ana, nimboe God ai nindou moaruwai hohoanimoyei arihündi ranaheimbo ai hüti-anei mambüsa? Nindou didai Godindi yifiri ranahambo daboadi hihirimandihinda? <sup>20</sup>Ŋga nindou se dideyafi se ra Godimbo afindi-afindeimbi yahurai hoafi-mandafindoyo? Wambüri ai nindou düdi sapo wambüri sümarandi ranahamboya, 'Se nimboe wambo ndaro sümarandiri?' mambisiyo. <sup>21</sup>Nindou düdi süra-randeimbi ranai purükini ra kandamündühi moani ahandi hohoanimonambo purükini mami ranahand-ambohündi wambüri yimbu südapirimbui. Ranimbo asu wambüri yimbu ra ŋgorü aboedi safi ahandi hohoanireandeimbi ra rarani hoafühi sesi ranambe raraofe rambohünda ndonde digembui. Ŋga asu ŋgorü moani yahuri ŋgoahuri nahurai ra moanindühi yafisühumi ranambe raraofe-rambohünda digembui.

<sup>22</sup>Mare yahurai God ai ahandi hürütü hohoanimo ra weindahi nafuimbo yahuhayambo asu ai muŋguambo nindou ahandi ŋginindi ranahambo fifirimbirihind-amboane yahuhayambo hohoanimoyasi. Ŋga asu awi ai nindou ŋginindayundüri ranaheimbo afuri gedühi hifandarandüri. Ŋga nindou ranaheimbo moaruwaimbo-fendürimbo-hündambo nafimara-mündindüri. <sup>23</sup>Asu God ai nindou muŋguambo ahandi himboamupuimbo-randeimbi ra nafuimbohündambo afuri gedühi hifandarandüri. Nindou daboe ai hipoamboareandüri ranaheimbo ahandi himboamupuimbo-randeimbi ra segudürimbo yahumboani. Ai ahandi himboamupuimbo-randeimbi moatükuni ra semindimbohünda nafimara-mündindüri. <sup>24</sup>Sihiri amboa, God ai sihefimbo diboniyuhü mborai mehumuni. Sudahündi ranaheimbo yaŋgiriipoani, ŋga nindou ŋgorü sirihündi ranaheimbo kameihi mborai mehundüri. <sup>25</sup>God ai Hoseandi Buk ranambe ai ndare hoafiyuhü yahuya,

"Nindou didiyei wandi nendiyeipoani,  
ranaheimbo ana wandi nend-anei mbisaha-ndürimboyahi.

Nindou daboe ro ŋgusüfo pefekoate-ayahi,

ranaheimbo ro ŋgusüfo pandi-hearümboyahi.

*Hosea 2:23*

<sup>26</sup>Asu nini hifihündi-yei ranaheimbo hoafiyahündürühi seiya, 'Ai ana Godindi nendiyeipoani,' masei,  
ŋga hifi ranih-animbo nindou ranaheimboya 'God yaŋgiri nüŋgu-randeimbi ranahandi nimor-anei,' mbiseimboyei," *Hosea 1:10*

Hosea ra mehu.

<sup>27</sup>Asu Aisaia ai Israer ranaheimbo yare hoafiyuhü yahuya,  
‘Nindou Israerihündi ai himonindi gudi kikiri afindi nahurai  
afindiyeisi,  
nga asu moani yimbu mami yanggir-animbo  
aboedambo-ndahimboyei.

<sup>28</sup>Ŋga Adükari ai ngiri afindi hoafindu,  
nga nindou muŋguambo hifihü aniboadei ranaheimbo nimai  
papi-hoafindandürihi  
ahei moaruwai hohoanimo ranimbohünda muŋguna rani takini  
tiŋirifo dagadürimbui,’ *Aisaia 10:22-23*

mehu. <sup>29</sup>Horombo Aisaia ranahambo amboani yare hoafiyuhü yahuya,  
‘Adükari Muŋguambo Ŋginindeimbi ranai sihefi amoao mami  
bidifiri ranaheimbo hiniŋgifendüri-koatembei-mbonana,  
sihiri Sodomihündi nahurai tüküyahundühumbo  
asu Gomorahündi nahurai nimboefi,’ *Aisaia 1:9*

mehu.

<sup>30</sup>Asu sihiri nüŋgumambisefa? Rani-moatükuni ranana ndahurai  
ane: Suda-yafe ndifo sapo tiŋirifoyokoate moani mbumundi hohoanimo  
süŋgufemboaye ranai ana nindou mbumundi Godindi himboahü  
tükümehindi. Sapo mbumundi hohoanimo ranaiyo anihondümbofe  
rani-süŋgu tüküfe arandi. <sup>31</sup>Ŋga asu Sudahündi sapo tiŋirifoyowohü  
mbumundi hohoanimo Godindi himboahü semindimbo ahinümbi  
hohoanimo yanggiri süŋgufembo rani-süŋgu ana moai mbumundi nindou  
Godindi himboahü tüküyahindi. <sup>32</sup>Nimboe sapo ai anihondümbofe  
hohoanimo rani-süŋgu mbumundi hohoanimo ra semindimbo moai  
hohoanimoyei, nga wani. Ŋga ai ahei moani ratüpuri rani-süŋgu  
yanggiriyo mbumundi hohoanimo ra semindimbo hohoanimoaye.  
Nimoei tiŋarühi bemareandi raninambo bendeirani bübürindei ŋgei  
pindeimboyei. <sup>33</sup>Bukambe ranahambo yare hoafiyowohüya,

‘Hoeirihü, ro Saion wafuambe Serusarem ngoafihü nimoei  
masihini,  
nga ranai-animbo nindou ranaheimbo bendeirani  
bübürindeimboyei,  
nimoei yitifo rananimbo aheimbo randeirani ai pindeimboyei.  
Ŋga asu nindou düdi ai ahambo anihondümbo-ariri ana,  
nindou ranai ngiri amoaniŋgi-ndu,’ *Aisaia 8:14; 28:16*

mehu.

**Israer ai moai Godindi-mayo mbumundi hohoanimo ra sahümündi**

**10** <sup>1</sup>Wandafi mami, ro ngusüfoambe wandi nindou Israer  
ranai aboedambo-mbeahindi samboanahi hohoanimoayahi!

Ranimboanahi ro aheimbohünda Godimbo didibafiyahando arihandi. <sup>2</sup>Ŋga ro aheimbo ndorihe fifirihe heheamboanahi hoafayahi, ai ana awi Godindi hohoanimo rani yanggiri süngufemboanei ngusüfo pararihindi. Ŋga ahei ngusüfo pefembo hohoanimo ra anihondü süngupoani. <sup>3</sup>Aiana moai ndorihi fifirihindi God ai nindoumbo mbumund-anei yahu hohoanimoayu ranana, ŋga aiana aheipoanimbo mbumundi tükufe hohoanimo-ane süngurihi arihüdi. Ranane asu God ai nindou mbumundi hohoanimo hiniŋgimareandi ra moai sahümündi. <sup>4</sup>Ŋga sihiri fifirarihüdi, nindou anihondümbu-arihori ana, ranaheimbo ndeara Kraisi ai ahinümbi hohoanimo süngufe ho ra moendimareandi. Ranimboane asu nindou ai anihondümbu-arihori ana, ai Godindi himboahü mbumund-anei.

<sup>5</sup>Moses ai nindou ahinümbi hohoanimo rasüngu mbumundi nindou tüküfemboayo ranahambo sürü pare masihendi. Ai yahuya, 'Nindou düdi ai ahinümbi hohoanimo meŋgoro muŋgu rani-süngure huhü rananimbo ai yanggiri gedühi nüŋgumbui,' mehu. <sup>6</sup>Ŋga asu nindou ai Godimbo anihondümbufoiwani asu God ai nindou ranahambo seana mbumund-anafi yahu arandi. Mbumundi tükufe hohoanimo ranana ndahurai-ane. Se ŋgiri randihi hohoanimondeihüya, 'Nindou didai sünambe magafua?' mbisei. Hoafi ranahandi nimindi ra 'Didai sünambe gafu Kraisi sihefimbo nderümündü makuda?' <sup>7</sup>Asu se ŋgiri randihi hohoanimondeihüya, 'Nindou didai hifini yifambe ranambe magada?' mbisei. Hoafi ranahandi nimindi ra 'Didai gadü hoŋguambeahindi Kraisi nderümündü madüfua?' <sup>8</sup>Ŋga mbumundi tüküfembo hohoanimo hoafi ra ndahurai-ane: 'Hoafi ranana akimi sihafi fikim-ane, sihafi yafambe hoeari raniwami eŋgoro asu sihafi ngusüfo ranambe.' Sapo anihondümbufo hohoanimo hoafi ranane ro bokarihehu arihüdi ra. <sup>9</sup>Se sihafi yafambenambo weindahi yaro hoafiyafihüya, 'Sisas ai wandi Adükar-ani,' safi mbura, asu sihafi ngusüfo ranambo God sapo Sisasimbo yifihüdi botimariri ranahambo anihondümbu-arowandi ana, se aboedambo-ndafoamboyafi. <sup>10</sup>Ŋga sihafi ngusüfoambe anihondümbu-riwandani God ai nindou mbumund-anafi yahuhaya asu sihafi yafambe ranambo weindahi hoafiyafani God ai aboedambo-ndeaninimbui.

<sup>11</sup>Bukambe hoafi ranai hoafiyowohü yahoya, 'Nindou düdi ahambo anihondümbu-ariri ana, nindou ranai ŋgiri amoaniŋgindu,' meho. <sup>12</sup>Suda-anei asu Suda-yafe ndifo rananei ranai ŋgorü-poanimbo ŋgorü-poanimbo-yahimboyeipoani, ŋga nindou Godindi himboahü mami sisimogodi yanggir-anei. God aiana muŋguambo nindou ranahei Adükar-ani. Asu nindou muŋguambo didiyei ai ahamboya farihawandüri sei arihüdi ranaheimbo aboedi-aboedireandüri arandi. <sup>13</sup>Ranimboyo Bukambe yare hoafiyowohüya, 'Muŋguambo nindou ai Adükarimboya farihawandüri sei hoafiyei arihüdi ana, ai aboedambo-ndahimboyei,'

meho. <sup>14</sup>Ŋga asu nindou ranai anihondümbfofe-koatendeihi ana, ŋgiri ahambo hoafindahündo. Asu ai hoafi ranahambo himborikoate-ndeihi ana, ŋgiri ahambo anihondümb-ndihori. Nindou ranai hoafi ra bokari-hefekoate-ndimondani asu ai ŋgiri himborindei. <sup>15</sup>Asu nindou koehefepura hokoate-ayomo ana, ai ŋgiri bokandihoundi. Ŋga Bukambe yare hoafiyowohü yahoya, ‘Nindou aboedi hoafi sahümündi asinei ra aboedi safane,’ meho.

**Israer ai moai aboedi hoafi ranahambo sahümündihü süngurihindi**

<sup>16</sup>Ŋga asu Suda yimbu-mami yangiri ai aboedi hoafi ranahambo sahümündi süngurihimboanei. Ŋga Aisaia ai yare hoafiyuhü yahuya, ‘Adükari, nindou ai yihoefi-mayo hoafi ra moai anihondümb-rihindi,’ mehu. <sup>17</sup>Ŋga rani-moatükuni ra ndahurai-ane: aboedi hoafi ra himboriyehiyeyi asu anihondümbfofe tüküme Feyo. Asu Kraisi ranahambo hoafi bokarihefembo aboedi hoafi ra himboriyehiane.

<sup>18</sup>Ŋga asu haponda ro düdueheandi, Anihondüyo Suda ai Godindi hoafi ra himborikoate-mayei? Wani. Hoafi ra ai anihondü himborimayei. Ŋga Bukambe yare hoafiyowohü yahoya,

‘Mungu-moatükuni God ai nafimarandi ranahandi hoafi ra  
muŋguambo hifi ranihö ho tüküme Feyo,  
ahei hoafi muŋguambo hifi kaiyowohü ho tüküme Feyo,’

*Buk Song 19:4*

meho. <sup>19</sup>Asükaiya ro düdueheandi, Awi Israer ai moai fifirihindiyo? Ai fifirimarihindi. God ai Mosesindi süngure hoafiyuhü yahuya,

‘Ro Suda-yafe ndifo ai mami ranini-poediyefipoani ranaheimbo  
fandiheheirani,  
asu Israer se ŋgusüfoambe moaruwai-ndeimboyei.

Ro Suda-yafe ndifo ai fifirifekoate-yeimbi ranaheimbo  
fandihehe-andürani,

asu Israer se ŋgusüfoambe ŋginindi-ndeimboyei,’ *Io 32:21*

meho. <sup>20</sup>Asu süngunambo Aisaia ana ai moai hoafimbo yihimboyu, ŋga God ai ahandi süngure yare hoafiyuhü yahuya,

‘Nindou wambo kokoendirikate-mayei raniyei wambo  
hoeimarihindiri.

Roana nindou wambo hohoanimoyokate-mayei ranaheimbo  
sowahi weindahi tükümeheandi,’ *Aisaia 65:1*

meho. <sup>21</sup>Ŋga asu Israerimbo ai yare hoafiyuhü yahuya,

‘Ro nimbini-nimbisi nindou hoafi mbahirihe-hindeimbi asu  
himborkoate-yeimbi

ranaheimbo wandi wari kikihiriha-mindindüri arihandi ai-babidi  
aboedi-aboedifembohünda,’ *Aisaia 65:2*

meho.

**God ai Israer bidifirambo hipoambo-mareandüri**

**11** <sup>1</sup>Ranimboanahi asu ro rarihe düdueheandi nda, Asu God ai ahandi nindou Sudahüendi munġuambo daboadanambo-mbareandüriyo asu wanimbeiyō? Wani! Ro Por amboani Sudahünd-anahi. Ro Abrahamindi ahuir-anahi asu Bensaminindi srambeahind-anahi. <sup>2</sup>God ai ahandi nendi Sudahüendi tüküfekoate-yeiambeahi fifireandürühi wand-anei mehu ranaheimbo ana moai daboadanambo-reandüri, ŋga wani. Asu se hoafi Eraisa ai Sudambo papi-hoafirandürühi yare Godimbo didibafimefiyu ra fifirihindai? Ai Godimbo yare didibafindowohü yahuya, <sup>3</sup>'Adükari, aiyomo nindou sihafi hoafi hoafiyomo-rundeimbi ahamumbo munġu hifokoamarüpuri. Asu ai sihambo sesi sihefe didibafiferambo fondi ra birimafoarundi. Ŋga ro mami yangir-anahi animboahi. Asu ai wambo hifokoefendirimbo mehomō,' mehu. <sup>4</sup>Ŋga asu God ai ahambo asükaiyu nüngure simbori hoafiyundoa? Ai hoafiyundühi yahuya, 'Ro 7,000 nindou wandambofimbī sahapurimindi animboahi ai tikai god Ber ahambo yiri yimbu pusifekoate-mayeī,' mehu.

<sup>5</sup>Rahurai-ane hapondani amboani nindou yimbu-mami God ai ahandi moani hipoambofe ranambo dibonimayuwa aniboadei. <sup>6</sup>God ai aheimbo moani hipoamboreandürühi dibonimayundüri, ŋga ai nine ratüpurimayeī ranimbohünda diboniyu-ndürimboyupoani. Ŋga nindou ranai rani ratüpurিয়েani God ai diboni-mbeyundüri-mbonana, asu ŋgiri moani hipoambofe ra moani hipoambofe hondü tüküfeyo.

<sup>7</sup>Asu ranimbo-hünda sihiri nüngumambisefa? Rani-moatükuni ranahambo Israer ai hüti kokomarihüendi ra asu ai moai sahumüendi. Ŋga nindou bidifiri God ai dibonimayundüri ranai yangiriyei rani-moatükuni ra masahümüendi, ŋga asu bidifiri ranai himbotühüfo papimareandüri Baibor yare hoafimayo nou. <sup>8</sup>Ai yare hoafiyowohü yahoya,

'God ai aheimbo ramareandüra moai ŋgusüfoambe hohoanimo purihümüendi.

Asu ahei himboarinambo ŋgiri hoeindihindi  
asu ahei himboambenambo ŋgiri himborindei,  
ŋga yare niŋgo hombo hapondanambe tükefeyo,' *Io 29:4; Aisaia 29:10*  
meho. <sup>9</sup>Defit ai hoafiyuhü yahuya,

'Nindou aiana sesesi-ndeiani kini tifiŋambe ahanei nou mbihaneia asahi.  
Asu ahei hohoanimo moaruwai rani-süŋgumbo nimoeifihī  
pimbeyeia asahi.

<sup>10</sup>Ahei himboari amboani dikireandürihimbo asu ai  
hoeifekoate-mbeyei-amboane.

Asu se aheimbo daboahamindi pupurügorihi hehi yahurai  
koadürümbo-koadürümbo rarihi mbinimboeia samboanahi,'

*Buk Song 69:22-23*

mehu.

### God ai Suda-yafe ndifo masemündündüri

<sup>11</sup>Ranimboane asu ro haponda düdueheandi nda, Sapo Suda ai bübürimayei peyehü muṅguna moaruwaimbo-reandürimboyo? Ai ra wanana! Iḡga sapo ai moaruwai hohoanimo-mayeiamboyo asu God ai Suda-yafe ndifo ranaheimbo ṅgusüfoambe garibi-mbirihindür-amboane yahuhayamboyo ahei ndifo ranaheimbo aboedambo-mareandüri.

<sup>12</sup>Suda ai moaruwai hohoanimo süṅgu-marihündamboyo asu God ai nindou muṅguambo ranaheimbo didiboado-mareandüri. Ai Godimbo daboadanambo-marioramboyo asu God ai ahei ndifo ranaheimbo mafarihendüri. Ranimboane asu muṅguambo Suda ai God sowana asükai gugurindahandani animbo nindou muṅgu ai aboedi hamindi hondü nimandeimboyei.

<sup>13</sup>Suda-yafe ndifo siheimbo haponda ro hoafehandüri nda. Siheimbohünda God ai wambo ahandi hoafi sahamindi harihandeimbi kamafoareandiri. Ranimboanahi asu ro ndani ratüpuri nda ranahambo boriyahühi yifirayahi. <sup>14</sup>Ranimbo asu wandi nendi ranai God ahei ndifo afarihendüri ra hoeindihindühimbo ranimbo ṅgusüfoambe garibindihimboyei. Ranimbo asu ro bidifirambo fandiheirani asu ai Ape sowana ṅgeiani aboedambo-ndearumbui. <sup>15</sup>God ai Sudambo daboadanambo-mareandüri asu ahei ndifo ranaheimbo ṅgunindimbo-mareandüri. God ai Sudambo asükai asemündündüri ana, ra nüngumandifea? Ai nindou yifihündi botefeyo nahurai-ane!

<sup>16</sup>Bret mami ranahandambo bidifiri kemündi Godimbo asayo ana, asu bret yiṗoate muṅgu ra ahandi yanggir-anendo. Asu nimi ahari mami ranahandi ahambo asego ana, asu düdüdü ranamboani ahandi yanggir-anendo. <sup>17</sup>Orif nimi hififehündi ranahandambo düdüdü bidifiri ai titaboari-hendühiyo asu nimambeahindi orif nimi düdüdü ranai ranifihi papimareandi. Suda-yafe ndifo seana nimambeahindi orif nimi nahurai-anei. Ranane asu haponda se aboedi emündü momoriyeihi Sudayei-mayo yanggiri niṅgombo hohoanimo ra hoe nahurai asahümündi. <sup>18</sup>Ranimbo-hündambo-animbo asu Suda orif düdüdü nou titaboari-mefoehindi ranaheimbo se yiṗoaruko-ndihindürimboyei. Nüngundahi borimandeaia? Seana moani düdüdü yanggir-anei, ṅga seana nimi ahari ranahambo tüpürihindühi-yeipoani. Iḡga nimi ahari ranane siheimbo tüpareandüri.

<sup>19</sup>Iḡga seanimbo hoafindeihya, Yini, ṅga sapo düdüdü ranai titaboari-foarindühiyo asu yiṗoefimbo rani fondühimbo fondi hinṅgimaremun-ane, mbisei. <sup>20</sup>Yini, ranana anihond-ane. Ai titaboari-mefoehindi ra Godimbo anihondümbofekoate-wamboyei ramehindi, ṅga asu seana ranihü rarihi animboei ra anihondümbo-rihi hehimbo-wamboyei ahei fondühi animboei. Iḡga asu se ranahambo afindi-afindeihi

siheihoarimbo borindeimboyei, nga awi yihimbondei. <sup>21</sup>Suda ai dödüdü hond-anei, nga God ai aheimbo moai nimindühi hiniᅅgirearü, nga titaboari-mafoareandi. Nga se hibadihündi. Se dödüdü hondüyeipoani, nga God ai siheimbo amboani nimindühi ᅅgiri hiniᅅgindearü, nga titaboari-boadeandürimbui. <sup>22</sup>Godindi hipoambo hohoanimo asu ᅅginindi hohoanimo ra sihiri diboadondihu fifirindihumboane. Nindou ahandi hoafi himboriyeisi, nga hiniᅅgimarihindi ranaheimbo ᅅginindi-ndarümbui. Nga asu se Suda-yafe ndifo ahandi hipoambofe hohoanimo rani-süᅅngu ahei ana, asu ai siheimbo hipoambo-ndearümbui. Nga se-amboani ahandi hohoanimo rani-süᅅngu hokoate-aye ana, randihi titaboari-boegimboyei. <sup>23</sup>Suda ai anihondumbo-arihindi ana, God ai asükai aheimbo nimindihü papindearümbui. God ai yifirayu ana, asükai aheimbo koadürü nimindihü papinde hiniᅅgi-ndeandürimbui. <sup>24</sup>Suda-yafe ndifo se-amboani nimambeahindi orif dödüdü-aneisi, nga asu aboedi orif nimindi ranifihü papirihimboanei, nga ranahandi hondüyopoani. Suda-anei ai hififehündi orif nimindi hond-aye. Ranimboane asu aheimbo ana God ai dödüdü hondü titaboari-mefoendi ra semündü asükaiyu koadürü nimindi hondüfihü papareandürü ana, ai asükai aboedi hamindi ranifihü peniboadeimboyei.

### God ai nindou munguambo hipoamboareandürü

<sup>25</sup>Wandafi mami, dibohindi hoafi ranimboanahi se fifirimbirihinda sahehea. Se siheihoari randihi hohoanimondeihü hoafindeihüya, 'Roana fifirihu hohoanimo-yefeimb-anehi,' mbiseimboyei saheeamboanahi. Hoafi nda yahurai-ane, Israer bidifiri ana hoafi himborikoate-yeimb-anei. Rani hohoanimo ranana ahei ᅅgusüfoambe nimandündürü ᅅgo-ᅅgombo asu Suda-yafe ndifo nünᅅgunümbiyei God ai dibonimayundürü ranai fondi ra simonᅅgori-ndamindimboe. <sup>26</sup>Rani süᅅngumbo-animbo God ai Israer aheimbo aboedambo-ndearümbui. Buk Baibor ai yare hoafiyowohü yahoya,

'Aboedambore-randeimbi ai Serusaremi-nipoedi kudu Sekopindi ahuri Suda ranaheimbo randeandürani, ahei Godimbo hohoanimo-koate hohoanimo hiniᅅgindihi-mboyei.

<sup>27</sup>Ranimbo ro ahei hohoanimo moaruwai ra gogorindi-heheandühi rani-simboan-animbo ai-babidi hoafi femindi sihefe ra randihea-mboyahi,' *Aisaia 59:20-21*

meho. <sup>28</sup>Nga Suda ai aboedi hoafi himborikoate-maye ranimboane asu God ai Suda-yafe ndifo siheimbo fehefembohündambo hohoanimomayu raniyo asu Suda ai ahandi hürütimb-anei. Nga God ai Sudambo dibonimendürü ranimboane asu ai ahandi horombo hoafimareandi Suda-yafe amoaombo ranahamumbo hohoanimoyuhü aheimbo ᅅgusüfo pareandürü arandi. <sup>29</sup>Nga asu nindou God ai aheimbo aboedi moatükuni

masagadüri asu dibonimendüri ranaheimbo ngiri hohoanimo ngörü-süngundeandi, nga wani.

<sup>30</sup>Horombo se Godindi hoafi himborikoate-mayei, nga hapoana God ai siheimbo hipoamboareandüri, Suda ai Godindi hoafi himborikoate-mayei ranimbo-hündambo. <sup>31</sup>Asu hapoana God ai siheimbo hipoambo-mareandüri ranimboane asu Suda ai Godindi hoafi himborikoate-mayei. Rani-moatükuni tüküme Feyondüri ra God ai aheimbo hipoambofe-ndürimbo-hündamboyo. <sup>32</sup>God ai nindou muṅguambo aheimbo hipoambofe-ndürimbo yahuhaya raniyo asu nindou muṅguambo ahei himborikoate hohoanimo ranina bobohiramündüri hiniṅgimarearü.

### God adükar-ani mbiseiamboane

<sup>33</sup> Godindi ngasündeandeimbi hohoanimo ra adükari hamind-ane!

Ahandi aboedi hohoanimo asu fifirife ra hoandari saf-ane!

Nindou didai ahandi hohoanimoyuhü hoafayu ra fifirinde hoafimanda?

Asu didai Godindi nafi muṅguambo ra fifirimanda?

Godindi hoafi hoafiyohü yahoya,

<sup>34</sup> 'Didi Adükarindi hohoanimoambe amaro ra fifireamboayua?

Didi nindou ai ahambo ratüpurimbo rasünguro rasünguro-meyundoa?

<sup>35</sup> Nindou düdi Godimbo nini-moatükuniyo masagado,

asükai ai süngunambo ahambo hihirife segodimbo-hündambo?'

*Aisaia 40:13*

meho. <sup>36</sup>Muṅgu-moatükuni ra God ai ahandihoari nafimarand-ane asu ahandi nginindinamboane aniṅgo asu ahand-ane. Muṅguambo si Godimbo adükar-ani mbiseiamboane. Nga anihond-ane.

### Sihefi fi ra Godimbo ndahundimboane

**12** <sup>1</sup>Wandafi mami, Godindi-mayo hipoambofe hohoanimo adükari ranimbo-hündamboane ro siheimbo hoafehandüri nda. Sihefi fi yanggiri niṅgoambe ra se moani Godimbo ndahündo ahambo sesi asihefeyo nou. Se ahandi yanggirindeian-animbo asu God ai ranimbo hihifi-hihifindümbui. Se randihindüh-animbo wudipoapondihi Godimbo hohoanimondahündo. <sup>2</sup>Se hifi ndanihündambo hohoanimo süngundihimboyei, nga sihefi hohoanimoambe simbori hohoanimo süngundihindi. Ranimbo God ai hohoanimoayu ra se ndondihi fifindihi mbundihü rasüngundihimboyei. Nini-moatükuni ai aboedayo asu nine ai yifirayu asu nine ai aboedi ndorihoeimbi hamindi hondayo ra se fifindihimboyei.

### God ai sihefimbo hohoanimo moani masendi ranambo ratüpurindefimboane

<sup>3</sup>Ngga God ai wambo ahandi-mayo moani hipoambofe hohoanimo masendi ranimbo muṅguambo siheimbo ro bidifiri hoafi hoafinda

samboanahi. Se siheihoari sihei fi ranahambo yangiri afindi hohoanimo-ndeimboyei, nga wani. Nga God ai siheimbo anihondümböfo hohoanimo masagadüri rani simongörühi safi sihei fi ranahambo ndondöhi hohoanimondei. <sup>4</sup>Sihiri ana fi mamami ranifihi afindi moatükuni ngörü-poani ngörü-poani fi ra hifoareamboane. Ranane asu ngörü-poani ngörü-poanimbo fi ranai ahandi ngörü-poani ngörü-poanimbo ratüpuri mbeñgori. <sup>5</sup>Rahurai-mayowamboane asu sihiri nindou afind-anefisi, nga asu Sisas Kraisindi finambo ana sihiri fi mami rananefi. Ranimboane asu sihiri ana nindou ngörü-ngörü ra sihiri mami wandafi mami yangir-anefi fi mami ranifihi.

<sup>6</sup>God ai sihefimbo moani hipoambo-reamunühüyu asu ai nindou mamami sihefimbo rani-poanimbo rani-poanimbo fifirife moani masemuni. Godindi hoafi hoafimbohünda nindoumbo ratüpuri ra segodoa asemüdu ana, sapo anihondümböfo hohoanimo ai asemüdu rani-süngu animbo hoafendomboane. <sup>7</sup>Düdi ai farihefembo ratüpuri ra asemüdu ana, ai ndonde mbifari-hendamboane. Asu yamundifembo ratüpuri ra asemüdu ana, ndonde yamundi-mbireandamboane. <sup>8</sup>Nindou mami ai ngüsüfoambe kikimofeofendürimbo ratüpuri ra asemüdu ana, asu ngüsüfoambe kikimo-mbifoareandüramboane. Nindou düdi ai nini-moatükuni napoyo masihendi ra nindou bodimondambo yiboböfo saimbo ratüpuri asemüdu ana, ai afindi saimbo nimbonindu. Nindou düdi bogorimbofe ningombo ratüpuri ra asemüdu ana, ai ratüpuri ra tijirifo-mbiyuwamboane. Düdi ai hipoambofe ratüpuri asemüdu ana, ai moani hihifi-hihifinambo nindou ngörümbo mbifari-heiramboane.

#### **Wandafi mamimbo aboedi hohoanimoyondo hohoanimo**

<sup>9</sup>Nindou ngörümbo anihondümbo ngüsüfo pandihindi. Nine-moatükuni moaruwai-ayo ranahambo yiboaruko-ndihindi. Nine-moatükuni aboedayo ranahambo kikihi-safindihümündi. <sup>10</sup>Se munguambo simbori hohoanimurindei se sihei fikiminindimbo hohoanimoaye nou. Asu nindou amuri ranaheimbo wambo ngasündühi-ndireimbanei mbisei hohoanimondei. <sup>11</sup>Afindi tijambombü ratüpurimbo hohoanimondei, nga asu se yiboaruko-yiboaruko-ndeimboyei. Se ratüpuraye ra Adükarimbohünda ratüpurindei. <sup>12</sup>Se Adükarimbo anihondümbo-ndihorühi hibadihorühi hihifi-hihifindei. Tijirifo siheimbo tükündifeyoani se afurindihindühi nimandei. Nimbim-nimbisi se Adükarimbo didibafindahi ndihündi.

<sup>13</sup>Sihei anihondümbo-rihindeimbi wandafi mami ai napo mbonimbo-ndihümündiani se aheimbo sihei-mayo ndahündüri. Asu ndifo nindou tükündahindaniwani aheimbo amboani worinindihindüri.

<sup>14</sup>Nindou siheimbo moaruwaimbo-arihindüri ranaheimbo God ai aboedi-aboedi-mbireandüramboane mbisei hehi didibafi-ndahindüri.

Godimboya aheimbo didiboado-mbireandüramboane mbisei, nga ngiri se Godimboya aheimbo moaruwaimbo-ndowandüri mbisei. <sup>15</sup>Nindou hihifi-hihifayei rani-babidi hihifi-hihifimbeyei-amboane, asu nindou aranayei rani-babidimbo amboani aranimbeyei-amboane. <sup>16</sup>Sihei wandafi mami rani-babidi wudiwudindahindi. Se ngiri aboedi nindou yangiri hohoanimondei wudindihindüri, nga se nindou moaruwai rani-babidi nimboei. Asu se sihei fimbo hohoanimondeihi ro fifiriheandeimb-anahi mbiseimboyei.

<sup>17</sup>Nindou ngorü ai siheimbo moaruwai-moaruwaimbo-ndihindürani, asu se simbori aheimbo moaruwaimbo-ndihindürimboyei, nga yowani. Nine hohoanimo nindou ai aboed-ane ase ana, se rani yangir-animbo randihindi. <sup>18</sup>Se muṅguambo nindou-babidi aboedi nimarimbohündambo nafi kokondihündi. <sup>19</sup>Wandi wandafi, nindou ai siheimbo moaruwaimbo-ndihindürani asu se siheihuari rani-moatükuni ranahambo simbori hihirindihi randihimboyei. Iḡa moani randihi hiniṅgindihindani God ai aheimbo ṅginindi-mbirandürimboane. Bukambe yare hoafiyowohü yahoya,

‘Nindou ngorümbo hihirife moaruwaimbofe ranana wandi ratüpur-ane.

Wandihoar-animbo ro aheimbo simbori moaruwaimbo-ndihearümboyahı,’

*Io 32:35*

mehu Adükari ai. <sup>20</sup>Iḡa asu, Bukambe yare hoafiyowohü yahoya,

‘Nindou sihambo hürütüranini-randeimbi ranai wembombonduanı, ahambo sesi dabado,

asu amindaniḡombo-nduanı, hoe dabado.

Se ahambo randoworani ana, ai sihambo ramareanini ranimbo asu ai amoaniḡi-ndümbui,’

*Sindaun 25:21-22*

meho. <sup>21</sup>Moaruwai hohoanimo ai ngiri sihambo ṅgasündeanini haya hifinambondeanini. Iḡa se aboedi hohoanimo rani-süṅgundowandühi ratüpurindafan-animbo asu se moaruwai hohoanimo ranahambo hifinambondowamboya fi.

### Sihiri gafmani-yomondi hoarehindefomboane

**13** <sup>1</sup>Nindou muṅguambo gafmani-yomondi hoareh-animbo niṅgomboane. Iḡa moai gafman ai aimbo hoangiru tüküyafundi, nga Godindi hoafi süṅgu ahandi warihünd-anemo. Muṅguambo gafman ra God ai kafoare hiniṅgimareapur-anemo. <sup>2</sup>Ranimbo-hündamboane nindou ai gafmani-yomondi hoafi mbahirarihehindi ra asu Godindi hoafi kameih-ane mbahirarihehindi. Ranimbo wamboane asu ai tiṅirifo ndahümündimboyei. <sup>3</sup>Gafman ai nindou aboedi hohoanimo ratüपुरi rawarihindi aheimbo refendürimboyopoani, nga nindou düdi ai moaruwai hohoanimoayu ranahambo refembo-hündamboanemo

aniŋgomo. Gafmanimbo yihimbombo se moeimboyafi? Refe ana, se moani aboedi ratūpuri rani yaŋgir-animbo süngundowandani asu ai sihambo aboed-anafi mbisimo hoafindimboemo. <sup>4</sup>Gafman aiana Godindi ratūpuriyomo-rundeimb-anemo se aboedi mbinimbafa yahomo houmbo aniŋgomo. Ŋga asu se moaruwai ratūpuri randowandūhi rananimbo se yihimbondafi ranahambo. Ŋga aiana moai moani ŋginindi moatükuni ra semündu. Aiana God kafaore hiniŋgimareandi wambo asu ai Godindimayo ŋginindi nindou moaruwai-mbofe hohoanimo ra semündümboani nindou ai moaruwai hohoanimoyei aheimbo moaruwaimbo-fendürimbohünda. <sup>5</sup>Ranimbo-hündambo-animbo asu se gafmanindi hoarehi nimboei. Asu rani-moatükuni sünguefeyo ra moaruwai-mbofe ranahambohünda yihimbombo yaŋgiriyoani, ŋga gafmani-yomondi hoarehi niŋgo ra aboedi hohoanimo süngufe-ane.

<sup>6</sup>Ranimbo-hündamboane asu se gafmanimbo takis pirihi arihüdi. Gafman aiana Godindi ratūpuri ratūpuriyomondūhi rananemo asu ai rani ratūpuri rani yaŋgiri hifandiru arundi. <sup>7</sup>Gafman nindou ranahamumbo nini-moatükuniyo segodürimboayei ana, aheimbo moani rani-moatükuni ra dagadüri. Gafman ai ninini-moatükuni takisimboyo hoafindimondani, se ahamumbo ndehindi. Asu bogori nindou ranahandi hoarehindeihi asu ahambo ahinidei. Asu nindou ndüri adükarümbi ranahambo ndüri adükarümb-ani mbisei hohoanimondei.

### **Simbori ŋgusüfo pefembo hohoanimo**

<sup>8</sup>Se nindou ŋgorüdi-mayo nini-moatükuni ndowandifi mbunda simbori saimbo-mayo ra hiŋgindowanda gedühi niŋgomboe, ŋga yowani. Se sapo simbori ŋgusüfo pefe hohoanimo rani yaŋgir-animbo süngundihindi. Nindou düdi ai ŋgorümbo ŋgusüfo parareandi ana, ai muŋguambo ahinümbi hohoanimo meŋgoro ra süngureandeimbi nindou-ani. <sup>9</sup>Mosesindi ahinümbi hohoanimo ranai yare hoafiyowohü yahoya, 'Nimorehi nindowenihi-yafe hohoanimo moaruwaimbo-fepoani. Nindou hifokoefepoani. Hübuhünipoani. Nindou ŋgorüdi napo hohoanifepoani,' meho. Muŋgu rani ahinümbi hohoanimo ranane asu amuri muŋguambo eŋgoro ranane muŋguambo mamambere haya nimindi hoafi ra yare hoafiyowohü yahoya, 'Se nindou amurambo ŋgusüfo pandowandi se sihafi fimbo ŋgusüfo pararowandi nou,' meho. <sup>10</sup>Nindou düdi ai nindou ŋgorümbo ŋgusüfo parariri ana, ai ŋgiri ahambo moaruwaimbo-ndiri. Ranimboane nindou ai ŋgorümbo ŋgusüfo parariri ana, asu ai ahinümbi hohoanimo hondü muŋguambo ra süngurandüh-ani.

### **Sihiri moani mbumundi hahabodefomboane**

<sup>11</sup>Se fifirihimboanei haponda nini siyo sihiri animboefi ranimboane se rani hohoanimo süngundihindi. Ndeara rani si ra se mapoei-ane,

nga hapondan-ana se botindahindi. Horombo sihiri Godindi hoafi anihondumbo-rihundeimbi nindou nimboefimbo God ai sihefimbo aboedireamuneimbi-mayu rani si ra akimiyo, nga hapondani ana ndeara akimi safi tüküfembo yanggir-ane. <sup>12</sup> Nimbi ai ndeara muṅgumbo yanggiriwowohü asu si ai ndeara akimi simbo yahomboane. Nimbokoanindi ratüpuri ra hiniṅgifemboane, nga asu sirihüdi yifiari napo ra ndahumindeto-mboane. <sup>13</sup> Nindou sirihü aboedi anüṅgu nou sihiri nimboefomboane. Sihiri mamikari hohoanimoyo wakife asu bia simindi hefe mamikari hohoanimoyo wakifeponi. Nimorehi sisihimoyo wakife asu moaruwai hohoanimoyo wakifeponi. Watikoafi hoafiyo asu nindou ṅgorumbo ṅgusüfoambe moaruwaimbo-fepoani. <sup>14</sup> Nga se Sisas Kraisimbo yanggir-animbo yifiari niminehoarimbo-ndihori sihefihü güdihori. Nga sihei horombodidi moaruwai hohoanimoyo ṅgusüfoambe amaro ranahambo süṅgundihimboyei.

**Wandafindandi hohoanimoyo ra sihiri yibobo-ndihumboyefi, nga wani**

**14** <sup>1</sup> Nindou mami ai Godimbo anihondümborirani asu ahandi anihondümbote ra kehurindoani ana, asu se ahambo Godindi nendi sihei mbusümo ndahorimindei ṅgei. Asu ai nine hohoanimoyu ranahambo simbori wataporimbo-ndühimboyei. <sup>2</sup> Nindou mami ai ahandi anihondümbote hohoanimoyo ṅginindi süṅguareandi ana, ai muṅguambo sesi ra sesühani, nga asu nindou ṅgorü ai ahandi anihondümbote ra kehurayo ana, ai ṅgiri safi aboedi dedu, nga wandümo yanggiri sesühani. <sup>3</sup> Nindou ai muṅguambo sesi sesü-randeimbi ana, asu nindou moani wandümo yanggiri sesümbi-mayu ranahambo yowani moaruwai hohoanimoyo-yondopoani. Asu nindou wandümo yanggiri sesü-randeimbi ranai nindou muṅgu-moatükuni sesümbi-mayu ranahamboya, aiana moaruwai hohoanimoyu-randeimb-ani yahopoani. God ai nindou ranahambo amboani serümündumboani mbohünda. <sup>4</sup> Nindou se didiyafi, asu se nindou ṅgorüdi ratüpuriyu-randeimbi nindumbo yiboboariwora? Nindou sapo ahambo hifandarandi ai-animbo ahandi ratüpuri ra aboedimbayo wanimbayo mbüsü yibobondeambui. Nga asu ratüpuriyu-randeimbi ahandi ratüpuri aboedi ṅgomboe nimboe sapo Adükari ai ahambo ṅginirümündü nūṅgumbo wambo.

<sup>5</sup> Nindou mami aiananiya mami si ranana ai adükari hamindiyo haya amuri si aho ranahambo ṅgasündeamboane yahuhani. Nga asu nindou ṅgorü aiananiya muṅguambo si aho ra simogod-ane yahuhani. Nindou mamami se siheihori ṅgusüfoambe hohoanimoye hoendihindüh-animbo hohoanimoye. <sup>6</sup> Nindou düdi ai mami si ra adükari si-ane yahuhani ana, ai Adükariyo yanggiri hohoanimoyo-yundowohani. Asu nindou düdi ai muṅguambo sesi sesü arandi ra ai Adükariyo hohoanimoyuhani asesu. Rani sesi ra Godimbo hihifirüri mburamboani

asesu. Asu nindou düdi ai muṅguambo sesi wehayu ra Adükarimbo hohoanimo-yundowohani wehayu. Asu ai amboani Godimbo hihifirürühani.

<sup>7</sup>Nindou mamami sihiri moai sihefi hohoanimonambo yanggiri nimboefi. Asu mamami sihiri moai sihefipoanimbo hohoanimonambo yanggiri yifiyefi rihundi. <sup>8</sup>Sihiri yanggiri animboefi ra Adükarimbo hohoanimo-yefühanefi. Asu sihiri yifayefi ra Adükarimbo hohoanimo-yefühi yifayefi. Sihiri nimboefühindowani asu yifindefühindowani ra moani sihiri Adükarindi yanggiri hamind-ane fi. <sup>9</sup>Ranahambo sünguyo nindou yanggiri animboei-anei asu yifimayei-anei ahei Adükarimbofe niṅgombo-hündamboyu Sisas amboani yifiyu mbura asu hoṅguambeahindi yanggiri botimefiyu.

<sup>10</sup>Asu se, nimboe sihafi wandafindandi hohoanimo ranimbo yiboboariwora? Asu se, nimboe sihafi wandafindambo yiboaruko-arowora? Sihiri ranahambo fifirindihumboane, ṅga muṅguambo sihiri Godindi himboahü nimboemboeyefi ai sihefimbo yibobofemunimbohünda. <sup>11</sup>Bukambe hoafi ra yahoya,

Adükari ai yahuya, ‘Ro yanggiri nimboambo dabareheandi  
nindou muṅguambo ranai wambo yiriyimbu  
pusindühi-ndihümboeyi  
asu nindou muṅguambo ahei yafambenambo weindahi  
hoafindahündürühi God Adükar-ani mbiseimboeyi,’

*Aisaia 45:23*

mehu. <sup>12</sup>Ranimbo-hündambo-animbo asu muṅguambo sihiri sünguna Godindi himboahü sihiri nine ratüpuri ratüpurimayefi ranahambo hoafinda-hundimboeyefi.

<sup>13</sup>Ranimbo-hündambo-animbo asu wandafi-babidi simbori yiboboferüpoani, ṅga rühisafi hiniṅgifemboane. ṅga sihiri ṅgorü hohoanimo süngundihumboane. Sapo sihiri mami moatükuni refeyoani ana, wandafi ai bübüründühi moaruwai hohoanimo süngundifimbui rani hohoanimo ana hiniṅgifemboane. <sup>14</sup>Ro Adükari dibo-anahi, ṅga ranimboanahi rani-moatükuni ra ro fifiriheamboanahi. Moai nini sesi ai ahandihoari moaruwaiyo. Nindou ai rani-moatükuni ra moaruwai-ane ehu ana, moani ai ahambo moaruwai-ane. <sup>15</sup>Ra ai yahurai-ane. Se nini-moatükuniyo sowasifani ranimbo-hünda sihafi wandafi ai hoeireaninühi afindi hohoanimoyafu ana, asu se ahambo moai hohoanimoyafi. Sisas nindou ranahambohünda yifimayuane, ṅga asu sihafi sesi hohoanimo ranambo se nindou ra moaruwaimbo-ndiworimboeyafi. <sup>16</sup>Se mami moatükuni ranahambo aboed-ane asafi ana, se hibadambo. Sihafi hohoanimonambo yanggiriyo, ṅga moaruwai-ane mbiseimboeyi. <sup>17</sup>Sesi, sesi asu hoe simindi hohoanimo ranana God ṅginindi hifandarandi ranahandi nimindiyopoani, ṅga wani. ṅga God ṅginindi hifandarandi

rani nimindi hohoanimo-ane nda. Mbumundi hohoanimo, ŋgusüfo afurifimbi hohoanimo, asu Yifiafi Aboedindi hihifi-hihifi hohoanimo ra. <sup>18</sup>Nindou ai Sisas Kraisindi ratüpurimbo yangiri rani hohoanimo süngu anüngu ana, God ai ahambo hihifi-hihifindundowani asu nindou amuri ai-amboaniya ai nindou aboed-ani mbisahündomboyei.

<sup>19</sup>Ranimbo-hündambo-animbo asu munguambo ai sihefimbo mamambefemuni hohoanimo asu wandafi mamiyei hohoanimo ŋginemindündüri rani yangiri sünguni-ndihumboane. <sup>20</sup>Se sesi ranahambo yangiri hohoanimondeihi asu God ai nine-moatükuni ramareandi ranahambo moaruwaimbo-ndihimboyei. Mungu sesi moatükuni ranana aboed-ane. Ŋga asu se nine sesi sowasifani nindou ŋgorü ai ranahambo ahandi fimbo moaruwai-ane yahu mbura asesu ana, ai moaruwai hohoanimoyuhani asu rananimbo se-amboani moaruwai hohoanimo-yafühanafi. <sup>21</sup>Asu se ninihondi sowasifi, bia simindifi, asu amuri moatükuni aho ra rarowandani ranimbo sihafi wandafi ranai hohoanimo moaruwai hohoanimondurangi ana, asu se rani-moatükuni ra hiniŋgindowandi. Ranane aboedayo. <sup>22</sup>Se nine hohoanimo anihondumbo-arowandi rananimbo God-dibo se yangiri hohoanimondafi kikihindowandi. Nindou ai moani ahandihoari mami moatükunimbo aboed-ane yahu hohoanimoayu ana, ra aboed-ane. Asu rani hohoanimo ranai ahandi fi ranahambo papi-hoafikoate-ndoani ana, asu ai hihifi-hihifimbiyu-wamboane! <sup>23</sup>Ŋga asu nindou ranai yimbu hohoanimo süngu sesi ra asesu ana, ai ra ahambo moaruwai-ane sapo ai nine sesi ranahambo moaruwai-ane yahuhaya asesu ranimbo-hünda. Nindou ai hohoanimo mami ranahambo aboed-ane yaho anihondü-mbofekoateyu randühi yare arandi ana, asu ai moaruwai hohoanimo-yumboani.

#### Kraisindi hohoanimo yangiri sihiri süngundihumboane

**15** <sup>1</sup>Nindou sihiri didiyefi anihondümbofe hohoanimo ŋginindi sahumündeifeimbi sihiri nindou düdi ai anihondümbofe kehuri arandi ranahambo farihefimboane ŋginindi niŋgomböhünda. Ŋga sihefi fimbo yangiri hohoanimopoani. <sup>2</sup>Sihiri mamami nindou sihefi wandafi ranaheimbo aboedi niŋgomböhünda didiboado-ndihundürani ai hihifi-hihifindeimboyei. Rananimbo asu ai ŋginindi nimboeimbo anihondumbo-ndihimboyei. <sup>3</sup>Ŋga Sisas Kraisa ana ai moai ahandi fimbo yangiri hohoanimoyu. Ŋga asu ai ramefiyu ra, Bukambe hoafimayo nou, 'Ape, nindou sihambo moaruwaimbo-marihinini hoafi ra sini wambo gabudi-mafoareandiri,' mehu. <sup>4</sup>Munguambo hoafi horombo Bukambe sürü papimarandi ra sihefimbo yamundife-munimbohündamboyo sürü papimarandi. Rani hoafi ra sihefimbo ŋgusüfoambe ŋginiramindimuni asu afurihemuna anihondümbondihu himbondefühi nimboemboyefi. Ranimboane asu sihiri anihondumbo-ndihundühi nimboemboyefi. <sup>5</sup>God

ai ŋgusüfoambe ŋginemindimbo asu afurife niŋgombo hohoanimo ra sai arandi ai siheimbo mbifarihendür-amboane rananimbo asu se Sisas Kriasimbo süŋgurihi arihündi, sihei mbusümo mami hohoanimo yaŋgiri süŋgundihimboyei. <sup>6</sup>Ranimbo asu se hohoanimo, yafambe mamambendihi mbundihü, sihefi Adükari Sisas Kraisindi God asu afindi ranahandambo adükar-ani mbisefimboane.

**Krais ai Suda asu Suda-yafe ndifo ranaheimbo mafariheirü**

<sup>7</sup>Nindou ai Godimbo aboed-ani hoafimbohündambo se siheihoari ndahümündihündüri sapo Krais ai siheimbo masemindündüri nou. <sup>8</sup>Ŋga ro siheimbo hoafehandüri, Sisas ai Suda-yafe ratüpuriyu-randeimbi nindoumbofi manüŋgu. Ranimbo asu God ai ahei amoa mamimbo horombo hoafire masihendi ra anihondümbo ramareandi ra nafuimbohünda Sisas tükümeŋfiyu. <sup>9</sup>Ranimbo asu Suda-yafe ndifo ai-amboani Godindi hiŋoambofe hohoanimo raninambo ahambo adükar-ani mbiseiya yahuhayamboyu rameŋfiyu. Sapo Bukambe yare hoafiyowohü yahoya, 'Ranimbo Suda-yafe ndifo ranahei himboahü ndüri adükarümb-ani mbisa hoafindamboya.

Asu sihafi ndüri herüna kakisaondi-haninimboya, *2 Samuei 22:50* meho süŋgu. <sup>10</sup>Asükaiyo Bukambe yare hoafiyowohü yahoya, 'Suda-yafe ndifo se-amboani Godindi nendi rani-babidi hihifi-hihifindei,' *Io 32:43*

meho. <sup>11</sup>Asükai hoafiyowohü yahoya, 'Suda-yafe ndifo muŋgu se Adükarimbo ndüri adükarümb-ani mbisei. Asu muŋguambo nimorehi nindowenihü se ahandi ndüri herüna kakisaondihori,' *Buk Song 117:1*

meho. <sup>12</sup>Asükai Aisaia ai hoafiyuhü yahuya, 'Sesindi ahuri ai tükündüfimbui. Nindou ranai-animbo Suda-yafe ndifo ranahei bogorimbondifi nüŋgumbui.

Ranimbo nindou ranai ahambo anihondümbo-ndihorühi hibadihorühi nimboeimboyei,' *Aisaia 11:10*

meho. <sup>13</sup>God ai anihondümbofe himboyondombo hohoanimo ra nimindühani. Se ahambo anihondümbo-rihori arihündi ranimbo-animbo asu ai siheimbo ahandi-mayo hihifi-hihifi asu ŋgusüfo afurife kife hohoanimo ra afindi safi mbisagadür-amboane. Ranimbo Yifafi Aboedindi ŋginindinambo sihei Godimbo anihondümbo-fihü himboyondombo hohoanimo ranai adükari hamindi ŋgomboe.

**Por ai Suda-yafe ndifo-yafe ratüpuriyu-randeimb-ani**

<sup>14</sup>Wandafi mami, ro ŋgusüfoambe anihondümbo-riheamboanahi se aboedi hohoanimo hohoanimoyei arihündi ranimbo. Se muŋguambo

mamami fifirife ra aboedi fifirihimbo wambo asu se siheihoari simbori yamundi-firindei. <sup>15-16</sup>Ro sihei hohoanimo asükainda botindihearü saheeamboanahi asu yihimbokoate bidifiri hoafi siheimbo sürü papimarihendi. Nimboe sapo God ai wambo rani-poanimbo nginindi masendi ranina Sisas Kraisindi ratüpuri Suda-yafe ndifo aheimbo farihefe-ndürimbohünda. Roana Godimbo sesi sihai-randeimbi nahurai ahandi-mayo aboedi hoafi ra Suda asu ahei ndifo ranaheimbo hoafiyahandüri arihandi. Ro ranaheimbo God sowana ndahamindi-handüri ngahani asu Yifiafi Aboedi ranai randeira asu ai Godindi yangiri tükümbeyahinda samboanahi. Rananimbo asu ro Godindi warihündi-hearümboyahi sapo ahambohünda ninihondi hifokoaru sihoemonda hihifefiyu nou.

<sup>17</sup>Rani ratüpuri ra Sisas Kraisi-dibo ratüpurayahi ana, asu ro Godindi ratüpurayahi ranimbohünda hihifi-hihifindamboyahi. <sup>18-19</sup>Ro ngiri amuri moatükuni ranahambo hoafindahi, nga nini ratüpuriyo Kraisi ai wambo ramareandi rani-sünguyu Suda-yafe ndifo Godindi hoafi süngumarihindi rani yangirimboanahi hoafinda sahehea. Ai wandi hoafi, ratüpuri ranahandamboyu farihendiri haya ratüpurimayahi. Raniyu asu Yifiafi Aboedindi nginindinambo ai wambo mafarihendira hepünüfeimbi moatükuni asu Godindi nginindi nafuimbo moatükuni ra ramariheandi. Ranimboyahi ro Serusarem ngoafihü peya hehea Kraisindi aboedi hoafi munguambo ra wataporimbo-rihi hambo asu Iririkum hifihü tükümeheandi. <sup>20</sup>Rani ratüpuri ra nindou bidifiri ai Sisasindi ndüri himborikoate-yeimbi ranaheimboanahi ro ho aboedi hoafi bokarihefembo hohoanimoayahi. Roana wori moani ngorü nindoundi kambohoaniwami worimbombo-yahipoani hohoanimoayahi, nga wani. <sup>21</sup>Iga Bukambe yare hoafiyowohü yahoya,

‘Nindou didiyei ai Kraisi ahambo hoafiyondüri-koate-memondüri ai animbo hoeindihori-mboyei.

Nindou didiyei ai ahandi hoafi himborikoate-yeimbi ai animbo ahambo fifirindihorimboyei,’ *Aisaia 52:15*  
meho ranimboanahi refembo hohoanimoayahi.

### **Por ai Spen hifina hombo hohoanimomayu**

<sup>22</sup>Ranimbo-hündamboanahi asu ro siheimbo sowana afindimbo tüküfembo kıkariheheandi. <sup>23</sup>Iga asu ndani hifini ro ratüpurimbo ratüpuri moai ningo. Afindi himbani maho ra ro siheimbo sifo hoeifendürimbo sahehea hohoanimomayahi. <sup>24</sup>Iga hapondani ana awi refembo himboayo. Ro Spen hifina gagühühi asu nafina siheimbo sini hoeifendüri hefe homboanahi hohoanimoayahi. Rananimbo awi ro didi asu ranihü se-babidi akidou nimandi hihifi-hihifinda sahehea. Siheimbo hoeindihe hini ngindihearü heheambo-animbo, asu se wambo Speninambo hombo ranafi fandihehindira ngamboane.

<sup>25</sup>Ŋga awi haponda hamindi ana Serusareminambo Godindi nindou ra farihefe-ndürimbo hahühanahi. <sup>26</sup>Godindi nendi bidifiri Serusaremi-yafe mbüsumo amarei ranai napokoate-mayeiamboyei Masedonia asu Akaiahündi Godindi hoafi süngurihindeimbi ai kaki gugurife mburümbo farihefe-ndürimbohündambo hoafi firihümündi masihehindi. <sup>27</sup>Ai ahei hohoanimonambo yanggiri moani kaki ra guguribi masihehindi. Suda ai ahei ndifo nindou ranaheimbo Godindi aboedi hohoanimo raninamboyo farihehindürühi didiboado-marihindüri. Ranimboane asu Suda-yafe ndifo ranamboani Sudambo ahei fi niŋgo hohoanimo ranimbo simbori mbifarihehi-ndüramboane. <sup>28</sup>Rani-moatükuni ra ro mungundihe mbundühambo-anambo samboanahi. Ro kaki Suda Serusaremihündi ranahei warambe hiniŋgindihe heheambo-animbo, asu ro Spenina ŋgahühi nafina rühi didi siheimbo hoeindi-hearümboyahi. <sup>29</sup>Siheimbo sowana asinihi ana, ro fifiriheamboanahi Kraisindi-mayo didiboadofe hohoanimo rani simongorühi didimboyahi.

<sup>30</sup>Wandafi mami, Adükari Sisas Kraisindi süngu asu Yifiafi ai ŋgusiŋgo pefe sai-randeimb-ane rani-süngu ro sihei ŋgusiŋgoambe botiriheandühi siheimbo hoafehandüri nda: Se wambo fandihehindiri hehimbo Godimbo didibafifembo ra tiŋirifo-ndefomboane ai wambo farihefe-ndürimbohünda. <sup>31</sup>Nindou Sudiahündi Godindi hoafi süngufekoate amarei ra wambo-yindirimbo maseimbo se wambohünda Godimbo didibafi-ndahindani animbo asu ai wambo ahei warambeahindi aboedambo-mbireandiramboane. Asu se didibafi-ndahindan-animbo ai wambo fandihendira Godindi nendi Serusarem ŋgoafihü amarei ranai wandi-mayo fehefe ratüpuri ra ndorihi mbisahümündi-amboane. <sup>32</sup>Ranimboane asu God ai yare hohoanimoayu ana, ro siheimbo sowana hihifi-hihifümbi dügühühimbo se-babidimbo fi handihe nimandimboyahi.

<sup>33</sup>Sapo God, afurifimbi hohoanimo nimindühayu ranai munguambo se babidi mbiniŋguwamboane. Ŋga anihond-ane.

#### Nimorehi nindowenihi afindi aheimbo Por ai hihifimarandüri

**16** <sup>1</sup>Se sihefi rehi Fibimbo fihindühümündi samboanahi hoafayahi. Sapo ai Senkria ŋgoafihündi anihondümbo-rihindeimbi farihendüri-randeimbi-mayo ranahambo. <sup>2</sup>Se Adükarindi süngu Fibimbo fihindühümündi se-babidimbo sihei mbusümo mbiniŋgo-wamboane. Rani hohoanimo ranane aboedayo, ŋga Godindi nindou sihiri rani hohoanimo rananimbo süngundihumboane. Asu ninimboyo ai mbonimbo-ndamindowani ra se ahambo fandihehindi. Nimboe ai nindou afindi ranaheimbo farihendüri marandi asu wambo amboani mafarihendiri. <sup>3</sup>Sisas Kraisindi ratüpuri ro mami ratüpuriyefi-rihundeimbi Prisira, asu Akwirambo wandi-mayo hihifi hoafi nda hoafindahüpuri. <sup>4</sup>Nindou yimbu

ai yifimbo moai yihimboyafe wambo farihefe-ndirimbohünda. Ranane asu ro yangiriyahipoani ahafembo hihifarihapiri, nga wani. Suda-yafe ndifo Godindi hoafi süngurihindeimbi mungu ranamboani ahafembo hihifiri-hüpirühanei. <sup>5</sup>Asu wandi hihifi hoafi nda nindou ahafe worambe fandihi arihündi aheimbo hoafindahündüri. Wandi wandafi hondü Epainetusimbo amboani wandi-mayo hihifi hoafi nda hoafindahündo. Nindou ra ai boateiyu Esia hifihündi Godindi hoafi masemüdu. <sup>6</sup>Maria nimorehi sapo siheimbohünda ratüpurü tiñirifomayo ho ranahambo amboani se wandi hihifi hoafi nda hoafindahündo. <sup>7</sup>Wandi hihifi hoafi nda nindou yimbu Andronikus asu Suniasimbo hoafindahüpüri. Nindou yimbu aiana wandi srambeahindi-anafani, nga aiyafani ro mami mungu karabusambe manimboefi. Nindou aiana Godindi hoafi sowandümo homorundeimbi ahamundi mbusümo ndürimb-anafani. Ai boateiyafani wambo ngasündirineandiri hena asu ai Kra isimbo süngunimarini. <sup>8</sup>Ambriatus ai wandi wandafi hond-ani Adükarindi hohoanimo rani-süngu ahambo wandi-mayo hihifi hoafi nda hoafindahündo. <sup>9</sup>Urbanus ana Kra sindi ratüpurü ra mami sihiri-babidimbo ratüpurü-ru-randeimb-ani. Asu wandi-mayo hihifi hoafi nda ahambo hoafindahündo. Asu Stak isimbo wandi-mayo hihifi hoafi nda hoafindahündo nimboe ai wandi wandafi hond-ani. <sup>10</sup>Aperes ahandi Kra isimbo süngufe hohoanimo ra rarihi hoeirihinda mayowa nginind-ane masei, nga ahambo wandi hihifi hoafi nda hoafindahündo. Asu Aristoburusindi worambe nindou-animboei aheimbo wandi hihifi hoafi nda hoafindahündüri. <sup>11</sup>Herodion, wandi srambeahindi nindou, ahambo wandi hihifi hoafi nda hoafindahündo. Asu Narsisusindi worambe nindou Adükaribabidi amarei ranaheimbo wandi-mayo hihifi hoafi nda hoafindahündüri. <sup>12</sup>Adükarindi ratüpurü tiñirifoyafe-rinandeimbi Trifina asu Trifosa ahafembo wandi-mayo hihifi hoafi nda hoafindahüpüri. Persis wandi wandafi hond-ane asu ai-amboani Adükarindi ratüpurü tiñamboyo-randeimb-ane ahambo wandi-mayo hihifi hoafi nda hoafindahündo. <sup>13</sup>Rufus ana nindou aboedi hamind-ani Adükarimbo süngufimbo. Asu ahandi hondi ai wambo amboani ahandi nimori hondümboreandiri haya didiboado-mareandiri. Nga ahafembo wandi-mayo hihifi hoafi nda hoafindahüpüri. <sup>14</sup>Asinkritus, Fregon, Hermes, Patrobas, asu Hermas-anemo asu wandafi mami ai-babid animboei ranaheimbo wandi-mayo hihifi hoafi nda hoafindahündüri. <sup>15</sup>Firorogus Suria-anafe, Nereus, asu ahandi reh-ane, Orimb asu Godindi nendi ai-babid animboei ranaheimbo wandi-mayo hihifi hoafi nda hoafindahündüri. <sup>16</sup>Godindi nendi-yafe hohoanimona wandafi mami ranaheimbo simbori wakikihi-ndürimboane. Mungu ai siheimbo hihifarihündüri.

### Kraisindi nendimbo yikürübüru-rundeimbi

<sup>17</sup>Wandafi mami, siheimbo ro hoafehandüri nindou yikürübüru asu sihei anihondümböfe hohoanimo moaruwai-mboru arundi ranahamumbo

se hibadihümbo. Asu anihondümbo hoafi se masahümündi ranahambo gogonimbofoaru-rundeimb-anemo se ahamumbo sowahi ngeimboyei, nga bündahindi. <sup>18</sup>Yahurai nindou ana sihefi Adükari Sisas Kraiss ranahandi ratüpuri ra rarundühi-yomopoani, nga moani ahamundi fimbo hihifi-hihifi hohoanimo rani yanggir-ane ratüpuriyomo arundi. Ahamundi aboedi asu aparümbi hoafi ranambo asu nindou ai fifirifekoate-mayei ranaheimbo tikai hoafimemo. <sup>19</sup>Se Godindi hoafi sünguarihündi ranimbo hoafi ra mahowa nindou ai himboriyei parihimboanei. Ranimboanahi ro siheimbo hihifi-hihifayahi. Nga roana siheimbo se aboedi hohoanimo ra fifirindihindi samboanahi, nga moaruwai hohoanimo se fifirindihimboyei, nga yowani, saheeamboanahi hoafayahi. <sup>20</sup>God ana ngusüfoambe afurife kifeimbi hohoanimo ra nimindühani asu ngiri amitata Satanimbo yirüna pühindu sihei yiri hoarehi hifinambondiri. Sihefi Adükarindi-mayo hipoambofe hohoanimo ra se-babidi mbimari-ndüramboane.

#### **Nindou bidifiri ai Romohündambo hihifi hoafi koamarihendi**

<sup>21</sup>Ro mami ratüpuriye-rihoandeimbi Timoti ai siheimbo hihifarandüri. Asu Rusius, Seson, Sosipater mami amboani wandi srambeahind-anemo ai siheimbo hihifi hoafi hoafemondüri. <sup>22</sup>Ro Tertius-anahi. Ro Porindi yafambehündi hoafi nda sahamindi heheamboanahi sürü papimarihendi. Adükarindi ndürinambo ro siheimbo hihifi hoafi nda hoafayahindüri. <sup>23-24</sup>Gaius ai siheimbo hihifi hoafi hoafeyundüri. Ro ahandi worambe-ane animboahi. Asu nindou bidifiri Godindi hoafi süngurihindeimbi ahandi worambe amboani mare rarihi arihündi. Erastus ai gafmani-yomondi kaki hifandi-randeimb-ani ndani ngoafihü asu sihefi wandafi Kwartus-ani ai siheimbo hihifi hoafi nda hoafefani.

#### **Sihiri Godimbo aboed-ani mbisefimboane**

<sup>25</sup>Asu ro Sisass Kraissimbo aboedi hoafi hoafiya arihandi raninambo siheimbo God ai ngininda-mündürimbui. Dibo hoafi nda horombo ana dibo mengoroyo, nga asu hapondaniyo God ai ra semündü weindahimareandi. <sup>26</sup>God koadürümbo-koadürümbo nüngumbü ai hoafimayuwa asu ahandi hoafiyomo-rundeimbi hoafi sürü papiru masihoemo raninambo dibo hoafi ra weindahi tükümegefeyo asu nindou ai ranahambo fifirimarihindi. Muñguambo sirihündi ai hoafi ra anihondümbo-rihindühi süngumbirihindi yahuhayamboyo God ai ramareandi. <sup>27</sup>God mami ai fifireandeimbi hond-ani asu Sisasindi süngu muñguambo si ahambo aboed-ani mbisefimboane. Nga anihond-ane.